


牧
庵
集
附
錄
五





牧 庵 集

附 錄

(五)

姚 燧 撰

牧庵集卷二十二

神道碑

榮祿大夫江淮等處行中書省平章政事游公神道碑。

公諱顯字子明。以至元十有九年拜榮祿大夫江淮等處行中書省平章政事。明年夏四月二十有一日。薨于位。享年七十有四。明年十月二十有八日葬。汴梁祥符縣之西鄉。後是二十有三年。當大德丁未。其元子海北廣東道廉訪使永錫俾其猶子偃。自汴而郢。持故翰林侍讀學士高凝所次事狀。以墓碑見託。燧徵而斂之。游世不可遠本。考逸其諱。妣呂代之。崞縣鉅姓。歲爲羊裘三千。以衣寒者。傭工錢平太和嶺石路艱崎。步輒售直白金爲兩五十。又代石橋嶲水。以通夏冬。閔漲病涉。鄉民惠之。目爲崇善老人。天馬南牧。金宣宗播汴。徙君許之臨潁東皋。卒葬其地。歲壬辰。拔許公隸大帥巴爾斯巴哈帳下。由是善國言。俾經歷其府事。後同千戶鄂烏蘭從諸侯王南征。破金商鈔房。禽何太尉。襄陽下。帥府版爲副達爾噶齊。軍將劉儀段哈雅實克叛。執公送建康。太尉劉石河言其材武。于制置孟珙。會珙移節于鄂。遣石河防秋。淮漢公說琪求爲前茅。遂得俱北。將及隨。與田僧住二騎夜遁。豺虎縱橫。出入林莽。瀕死數數。及郢之新野。適鄂烏蘭巡徼。相顧悲喜。偕至大將察韓所。爲驛致龍廷。歲庚子。入見。具陳思主棄妻子挺身來歸。及自建康抵鄂州軍鎮。戍形便。兵食虛實。我加兵誅。可以必舉。太宗喜。顧邇臣曰。若輩曾微一言及此。因嘉

歎公昔太祖由一回鵠迎降。賜以羊馬。授之璽書。從其所爲。人無誰何。卿自脫敵死。閒關以來。又非其所。欲賜白金五萬。其兩用之有竭。其封襄陽新民二百家。世爲佃民。加錫銀符錦衣二襲。亦授之璽書。從其所爲。人無誰何。歸率是民。復堰鐵拘壅湍水爲渠。溉稻田千數百頃。人賴其利。後宿衛憲宗。制授金符。以爲大帥。布拉吉達幕長。且行。賜之酒。辭。帝曰。卿辭朕前。將飲無人。所耶。公曰。臣何敢面欺。今旣効死軍前。請從此十年不御。歸至鄧。大帥軍漢北。敵壁間寂無人。開門拔幟。招諸軍進。及帝自將伐宋。謀由蜀入。兵及散關。公諫。巴蜀水則江流悍急。陸則陟降山巘。舟車皆不可施利。饋繼甚艱。六軍出此。恐非萬全之策。不若取道關東夷途。直臨江漢。世祖時。方淵龍。帝曰。左方之帥。朕已付之。業已至此。其有時宜。卽彼言之。歲戊午也。明年。世祖已禡而南。追覲于蕩陰。教自今凡所欲言。指故平章政事廉公。時以宣撫從征。偕以入告。大軍至黃陂。責中書納罕資取敵舟。公言。斯人傲忽于事。恐旣集者。不嚴守警。將復散走。而果然。俾公治別帖萬戶戰舟。而篙師不足。公曰。江南之民。居多瀕水。無不能操舟者。盡前俘壯士立兩幟下。令能右否。左得九百人。遂濟江。授之銀章。行宣撫使。世祖正位宸極。中統之元。制位中書左丞。大名宣撫使張公仲謙下。明年。代張公爲使。其襄辭曰。割愛就義。遇敵有功。處已端方。臨事敏給。又明年。李璫反。盜據濟南。張公撫訟。公嘗通書壇。帝謂近習。游某豈爲是者。鶯禽爲狐所憎。然耳。及籍壇家。而書無有。勅以認者。付公聽其甘心。其人亡命。踰年。公召至其妻子。曉之令出。保無他也。其人膝行于庭。祈死。公曰。吾誠爲是。汝言而可。吾所無有。而汝言然。汝爲妄人。且勅聽吾甘心。則生死惟吾。其忍汝殺。如昔遇之。公以平賊入。

賀進宴故事。非宗臣國人胡牀不入宮門。殿坐皆席地。不設榻。侍宴不稱觴。至是公請稱觴。制可之。後賜黃金盈斤。他日帝燕坐虎帳。方止人入。公至爲衛士所訶。爭呼于庭。帝曰。是非游某聲耶。召入。詰曰。何爲而然。公對。臣將有請。爲衛士所遏。不知疾言上徹宸聰。罪當滅死。帝默久而出之。裕宗時爲中書令。樞密使適至。復召之入。令盡所言。對以臣聞將改宣撫司爲宣慰司。且司者官之名也。使而下官之人也。由所官之人非才。事故弛而不治。何關乎官之名。今雖變名宣慰。不求惟賢。惟能任之。仍夫宣撫之人。猶惡夫鼓不鳴而新其枹。聲豈加大哉。因歷短諸臣。無少借隱。帝顧裕宗曰。汝他日求可眷倚者。須此輩人。至元二年。進嘉議大夫。益都路總管兼府尹。未幾改南京路總管兼府尹。四年。改大都路總管兼府尹。公以乘輿歲來。居冬其諸峙穀食馬藁。積諸物。和市之民。直多不給。爲所司盜。有豪宗鉅室。田疇連阡。有恃不輸。中下之家。率反戶。及公則以物力多寡。差賦之直。已無所漁牟。敢有爲舊鷲猾者。悉論如律。民力紓息。其半。賜楮幣五千緡。入言左右兩丞相安圖巴顏二大臣者。一居中書。其事足治。宜分命左丞相爲樞密。則六軍之政。將日齊肅于前。制可以巴延同知院事。六年。授河北河南道提刑按察使。八年。襄陽用兵之四年。改總管水軍萬戶。創石困七于漢中流。以絕敵舟。馘圍之兵千。改陝西四川道提刑按察使。皇子安西王國秦未至。公見之六盤。順聖皇后賜金帳。載數十里。用事臣欲置憲府。奎鈞慶賜之閣。憲副張庭瑞不受。曰。汝總管自有府。其卽彼以置。留車一夕。用事臣譏其不恭。銳欲深治。力陳辯。且責其人。叢珍罷右丞相。入爲大官。人有事于者。斥曰。吾守大釜鬻者。他非所知。汝王食官。不師此而行。乃越職沮撓風紀。或帝

聞之。謂王弗戢左右也。王雖不善。以受知列聖。身見其摧大臣于庭。且聞帝託裕臯于他日者。庭瑞由以得受輕罰。二巴延濟江下鄂。帝曰。游某曩者會事列聖。于朕前策取江南熟矣。非直能言。亦能爲者。今聞濟江而獨不與。意必熱中。其召以來。授前軍宣撫使。大軍臨蘇州。公從七騎。薄城呼曰。我游宣撫也。來曉告爾州將。丞相奉詔督諸軍以平江南。誅賞精明。其早自來歸。取富貴比他州將。不然。梯衝一樹。則加誅後服。爲屠常州續耳。無殃生齒數百萬也。王安撫卽以城下。公身至坊市。集吏民。諭以天子仁聖威德。軍律降城不誅。其安爾室家無恐。或持金爲謝。曰。吾非利貨爲者。授蘇州宣撫使。遣人四出招來逋民。凡得十三萬家。貸倉穀爲石百三十萬爲種子。民約秋熟償官。及期。民歡輸之。無少折閱。十四年。授中奉大夫。浙西道宣慰使。杭民聞來。相語曰。吾屬幸哉。善撫安蘇州者游公至矣。明年。入覲。布幣蕭牆。俄帝輦至。顧謂之曰。卿老人。宣力良多。一日。俾坐胡牀。持杖指使宮門何事不集。其日入宴。坐賜之榻。輟大官所上飲食之後。疾。遣尙醫持藥。衣白貂裘。皆殊恩也。疾已入謝。言江南賴陛下神武文軌一矣。惜往敷宣聖化者。不稱任使。敕語之中書。其年。國人爲浙西宣慰使者死。省奏以國人嗣爲上。曰。游某非國人何。且指盜殺臣爲平章者曰。是不可居汝下者。豈可久使亞人。明年。授中奉大夫。中書右丞。行浙西宣慰使。又明年。用兵日本。江淮福建湖廣之兵。將十萬衆。皆齊集資食于杭。凡廩米八十餘萬爲石。又造海艦若干百艘。材不足于用。勸富民佐木。皆酬其直。又鍛治甲仗。一令之下。星火不喻其急。動以失軍。輿緩制。敕從事。其堂帖無如瓢木弩莖刀。皆預爲千事。盜殺臣益忌。乃好言入聞。游某高年。當以某人爲使。少分其勞。實欲遣

位公右。上召其人。至曰。游某老人。汝可父事。其欲位汝。其下三四。何所惟其言。從十九年。是臣見殺于盜。其姻黨貪墨姦竄。上盜公帑。下厲齊民者。諸不法皆露。而東南新國。尤罹其毒。公爲鈞考。惟是一省徵賦。四百餘萬爲緡。明年。明州民饑。貸米石五萬餘。約償如杭。及再用兵日本。詔軍興百需。責使供億。其時已疾。獨支持視事。尋薨于揚州官舍。斯其所履歷措注。寵數大者。自餘其敏政。如尹京日。必待命于庭。秉令中書。乃歸治府。雖事叢至其前。必決一。或然火達曙。不得家食。則必取之市。霜雪寒慄。至宿于野。與造海艦于杭。役場達城二十里。比曉已。至督視。竟則聽政于司。夜必二鼓方息。其恤孤獨。或爲人所抑。則不大聲色。响响導使。盡言。事雖無迹。計數以求。必得其情。其推誠感物。如南京盜數人。竊戍軍之馬。于律當倍其償。軍迫南征。爲先假諸公帑。同署者難之。公則曰。過則在余。不及諸君。與之期日。縱盜歸取之家。如言而反。悉輸之官。受罰不訴。爲杭生獲荷葉浦賊周先鋒輩四人。公曰。堂堂宋室國家。取猶覆掌。鼠子何爲。皆官以巡檢。給衣服貨財。遣之曰。能與而餘黨舍賊爲平民。惟汝反面叛歸。亦惟汝。旬月招其黨。傾其巢窟。牛天王據海島。官軍加誅。積歲不能平。公惟遣象山僧往說之。乃與之偕來。凡此皆事動天聽者也。三夫人張氏。趙氏。完顏氏。子男四人。永錫。永祿。天祥。永弼。永祿知延安之綏德州。天祥入侍裕廟于東宮。與永弼皆不祿。女六人。長適陝西行省男趙某。次適提舉男路構。次適襄陽路總管馬國壁。次適蘄黃等路副宣慰呼圖克岱。次笄而夭。季適史太尉忠武公孫。知安陸府史熾。男孫四人。偃億。倫。僂。女孫二人。長適提點奉宸庫瓜爾佳思政。幼在室。男曾孫三人。元嗣。元偉。元暉。女曾孫八人。銘曰。

在昔英文名城判分爲開國臣。賚其庸勳。公時還南。首策平宋。克沃帝心。顧曰。禁從。咨汝如林。孰爲斯言。斯猷宜同。功勞位尊。其封襄民。爲家二百。其世有之。尙力是獲。定憲二廟。守而不渝。歲賦名城。天府尙需。獨復公家。盡私其有。雖儲千金。富無此厚。英文富之。世祖貴之。在笥衣之。玉食饋之。位亞人臣。龍光匪夷。自夫壬辰。迄于乙巳。五十年中。高明及此。謂非人豪。謂之曰何。概其平生。庶善則多。惟列聖知。無是爲大。爰筆之碑。永白隧外。

金故昭勇大將軍行都統萬戶事榮公神道碑

大德辛丑。燧持憲節。使江之東。其明年。袁之總公榮顯祖。書遣屬吏聶復禮王政。致父都漕君之與其同官題。與別駕喬簣成。季仲和。及江西憲僉郭貫。行省檢校閻宏之書爲先。以龐太史詠所狀會大父金都統萬戶公之行。擊舟三千里來宣。求墳道之碑。嗚呼。逝矣。勤哉。是有比焉。昔武勝軍節度趙愨死于金。及其子故同僉書樞密院事良弼使倭。哀鳴先朝。願詔詞臣。賜銘于石。制可。則異代之臣。能忠所事者。舉宜得誅。乃序之曰。孔子遊太山。見榮啓期年九十五。鹿裘帶索。鼓琴而歌于郕之野。曰。貧。士之常。死。人之終。孔子以爲能自寬。今榮氏家橫海之清池。遠邇不大遠。豈其遺苗歟。公諱祐。在金叔世。宣宗感國播汗。河朔豪傑。所在爭起。倡紜義兵。完保其鄉。金誑以官。冀賴其力。復所失地。聞公有衆踰萬。以爲昭勇大將軍。行都統萬戶府事。故奇其服。別異他軍。俾戲下皆華帽。人望空杠。子旄束旆。知爲公軍。遇士大夫。長于綏懷。衣食皆資其家。故戰人致死力。所當必摧。有傲蹠躄膾人肝者。立磔爲狗。以故其軍生齒並鄰。不耗焉。

卒葬清池。讚善鄉王強原。夫人王氏。子男四人。興既嗣。將將是軍。曰。吾于申令之際。不得不建。是都統。旗鼓。然戲下千戶。皆父之執。不可一旦偃肆。居上宜貶吾名。止曰千戶。一軍益喜。躍趨用命。其戰必前列。以身當敵。有所克獲。惟衆取之。少不覲見。與夫能寬且惠。皆聞見之。得其家者。河朔平。太宗卽位。三年辛卯。肇置徵收課稅。所河北東西道。辟爲滄鹽辦課官。時理財臣爭以苛剝相高。獨能恪其素守。人以善譽。卒四十五。瑄隆昌。塢官。塢積鹽而席其鈞石之所。次顯與貴。女子二。適李氏。孫男九人。當早卒。淮都轉運副使。自滄鹽利民場爲司判。副使。清鹽使。至以承務郎爲今官。終始鹽官。故悉其弊。蓋是司惟權。鹺利。煮海爲之。竈則不一。其所賦車縣發。輒自竈遠。或數百里。纔先與直三分一。至塢盡盡售之一。遇霖潦。留陷。淖。斃牛敗車。蹄輪填道。策于中書。願募商旅。納估于官。持券卽取諸竈。歲省車直爲緡三十餘萬。今著爲令。年饑。人噉草根木皮。預虞竈民散亡。稱貸鉅家米爲石千。布爲端萬。分賚之。約償樂歲。又大雨水溢。竈多冒沒。著不盈數。歲賦用逋。度支責徵。繫吏物獄。再至京師。求遣御史。按覆得實。復捐七千緡。皆惠政也。及顯祖同僉宣政院事。曰。吾子三品。榮耀矣。遂解組。課童耕桑。野服徜徉其鄉。嗚呼。其老子所云。知止不殆者耶。成漕司巡鹽官。次昌珪斌珍得孫都。女子子十人。適徐李趙某族。曾孫男五人。欽祖管鈎厚財場。繼祖大都行用庫副。次顯祖也。今以中憲大夫。袁州路總管。內勸農事。提調造茶。句當。袁隸行江西省。而舉刺則湖東憲府宏貫。皆言榮袁州良二千石。治最江西。貫燧所畏。宏嘗同太史氏。言皆可信。有是能子。爲臣明時。宜都漕君。輕去袖手一堂。坐視其猷爲也。紹祖以國言教授長蘆。慶祖禮部奏差。女子子六人。

適齊范王楊李嚴六族。元孫男五人。滋安源溥溢。女子子二人。銘曰。

屯難之世。弱不自濟。其依于強。亦勢必至。金德自宣。旣厭於天。接浙而南。河朔棄捐。俛俛遺黎。旣安舊土。匪連爲羣。有侮孰禦。維茲清池。海浦在東。桓桓榮公。萬夫所雄。如鳥之歸。有苑彼林。約束不待。來比鳥在。無他求爲。全生是賴。辟衆同舟。風濤中流。莫不奮楫。攸濟之求。公將是軍。善作士氣。人華其帽。表襮是異。昔魯烝徒。貝冑朱綬。何是肅暇。千載有今。萬夫洸洸。不一其面。而一其心。阻海之甸。非一公威。而一其仁。寒飢在人。如切吾身。孰有不裳。吾解以衣。孰有未殮。我庾其饒。猶惠小小。有甚大斯。匪曰禁殘。寡婦孤兒。人魚肉之。旣驚已久。天懋其功。宜熾厥後。子長千夫。年艾不遙。豈俟曾孫。畀其光昭。嗟惟令孫。才優治賦。何便不張。無盡不去。迨曾孫貴。考槃遽歌。子仕父休。止足如何。曾孫袁州。良二千石。登古七命。其進未極。凡之有家。孰造孰承。詩之金石。垂示雲仍。

浙西廉訪副使潘公神道碑

公潘姓。諱澤。字澤民。宣德府人。府在金惟州。曾祖嘗爲州孔目。而逸其諱。祖祿考得用。生行軍萬戶府提控。渙及濤。與公伯仲。氏皆善。厚殖其家。貲公讀書。壯而遊先師魯齋。左丞許公之門。盡夏故習。而氣質大變。養親不違其志。事兄愛以敬。閨闔有閑。及出門庭。卑以下人。語恐愴之。遇夙無所厚薄者。于途必謙謹。戀嫪。令盡所言。不峻謝別。用太保劉文貞公薦。由從事太府監。擢監知事。轉貳左藏庫使。出再提舉。織染局金符。在順天路官承直郎。宣德府則奉訓大夫。課皆最。陞奉議大夫。知宏州。兼諸軍教拉。始有土民以

行所學。郡旱。遍禱其境百神。已乃詣郭西泉投文祝曰。山川之神。其所司者。惟在能興雲雨。以水下土耳。早曠如是。不能膏澤之。神固已不得其職。使州刺有罪。幸漏譴于明天子。必將殃之。宜止其身。吾民何辜。橫摧斯毒。則爾神又佚罰矣。敢恐恐退。俟終不得命。當自劾去。其夜有光如星。騰泉。明日大雨。爲屋祠龍泉。上自公未至。州之南並山風爲災。又爲文禱曰。風者。天之號令。順四時。溫煖。凄凜之氣。發達。遂成萬物者也。時自爲惠。反之而已災。況暴厲無節。穴漏谷起。飄翔塵沙。偃擥禾稼。以疾民哉。禾民恃以生。上以出。縣官租賦。下乃仰以粢盛報事乎神明。今使之貧窘無所于食。目其艱苦之顏。耳乎愁嘆之聲。神亦安所利之。必州刺之是矜。其收是憑怒。自爾風災衰息。民賴至今。尤究心用獄。前政繫疑盜八人。榜掠百至。求迹無所。公明其非辜。皆出之。劫家訟公。故縱無幾時。而盜果得。西京械成獄。令待命他郡。過治。囚號市曰。此州之人。神明公。以爲包拯復生。獨不能相活邪。公將召問。同列謂宜發卒衛出吾界而已。讞非吾事也。公曰。人求直。其枉烏可陽爲充耳不聞。卒問之。蓋太原民輸稅西京。慮倉吏不以時受。入鈔貴家奴。令代其輸。旣如約矣。奴與僞爲鈔者友。陽悔之。有我善鈔。而歸所僞爲。我急其得不詳視也。出而用之。而事始露。有司鍛成之。謂我利賤而買之僞爲。首當以見知法。公列上之。竟雪其誣。而抵奴與僞爲者法。賦州市牛。公懲他郡驅牛至官。擇可受直。聽命旬浹。奔走煩勞。廢其穡事。令持價卽鄉民自爲市。吏無所姦利。駟僧亦不得上下。其直轉知興中州。入爲監察御史。刑部主事。特當國臣。知多行不法。察院召按。不能致。公從卒至部。捕之一訊。而貪墨皆出。論如律。轉僉山北遼東道提刑按察使事。治有田民殺其主者。獄已結。

矣。公詳讞之。則其妻與所私夫爲之。乃昭田民。當二人法。又有訟其豪室奴其一家十七人。有司觀願數年。不能正。公以凡今鬻人。皆畫男女左右食指。橫理于券爲信。以其疏密。判人短長。壯少與獄詞同。其索券視中。有年十三兒。指理如成人。公曰。僞敗在此。爲召郡兒年三十人。以符其指。皆密不合。豪室遂屈。毀券民之。或言高麗王有逆意。集將吏將徙故都。詔近臣偕公卽治。公以王今尙主。王設舉事。主安不知。知安不上變聞。而噎嘿以從。他臣治獄。希意深鷲。求竟。公獨輕平。主果馳使。明王無有事。從中變。制使多得罪。獨還公憲。尋入都事御史臺。剖白羣疑。商訂時才。自其口出。人所畏縮。皆身任爲。無少顧讓。然不專己。博咨之人。嘗曰。君子小人。喜以朋從。觀受薦何人。得過半矣。又致察其閒。有失而不中哉。今日必吾所識。則識有盡。不足列職中外。況未必盡賢。人曰。可者。審可。不必囿以資格。故評臺臣者。皆曰。自公都事察院監司。一時翕翕勝職最衆。出爲江北淮西道提刑按察副使。按宣慰家兒怙勢。抑買民物。不償直。與償而不滿者。皆比賊論。後改提刑按察爲肅政廉訪。轉江南浙西道肅政廉訪副使。方分司杭州。以至元壬辰秋七月一日卒。年五十五。仲氏子希善。希達。五千里輿柩歸鄉。明年八月始葬先域。夫人任也。三男。希大。希成。希安。大成。皆前卒。希永。他室。李出。三女。適任徐張氏。皆士族。公旣貴矣。進伯氏子希明。事裕宗于東宮。今出知隰州。後葬二年。伯氏懼公平昔之善。混其不聞。乃身入山。敦工伐石。求其同門友祕書少監楊桓狀其事。俾燧銘之碑。燧曰。公之爲人。桓爲行實。文何尙焉。念今之世子弟爲父兄求託。金石爲傳者。或多有之。如提控以兄。能反復致意其季者。纔獨一人。嗚呼。豈不若是不足爲愛敬報歟。銘曰。

維公生資粹其民彝。加及先師北面事之仁義。微辭道德盛儀日耳。以闕如垣厚基增崇其卑。如田有鑑多稼離離。尊聞行知。始由家推慈孝幼者。閨闈泉絲秩秩其宜。出焉郡治視民如兒。調均賦夷仁柔膚肌。何有創罷其禳其祈。山川百祇如指以頤。雨渥風衰誠之格思。罪入髡髻有少枉疑。猶己渴饑不身之私。竭蹙解纍必出是期。發摘吏欺大法小笞戢威顏眉。衣繡斧持遼浙江涯。皆所往釐。在在歌思。曰到遠而如何數奇。中塗其萎。識不識悲。中郎諸碑泰無媿爲。斯銘如斯。琢石以垂。信夫他時。

牧庵集卷二十三

神道碑

真定新軍萬戶張公神道碑

公既卒於戍所。衡州之明年。而夫人亦卒。其中子世其真定等路新軍萬戶。懷遠大將軍塔喇齊者。將歸葬其鄉先塋。由是軍受湖廣省節度。請告數數。終以故事。職兵之臣。無聽喪葬之文。不得命。乃曰。父子之有在君臣先。其序則然。未有責其能忠。而禁其爲孝者。吾今何恤。俟舟二喪畢葬。小從而奪虎節。大置於理。一惟命。竟窆而還。凡聞者。莫不稱咨其能拔流俗。善於子職。無少老一喙焉。又曰。公之遺烈。今雖在人。口耳不鏡之石。久或遺忘。來者或不聞。託以計事至鄂。持與國校官陳松年之狀來請銘。燧思昔貳荆憲。由糾郡常德。公時戍是。暇則相過。年已六十五。修幹魁顏。白鬚蝟張。虎目虎吻。大掌鉅踵。望之森然。氣欲搏人。談其平生。蹈危奮先。大小之戰數十。嗚呼。俾聞風颯。鼓鞞闐闐。矢石餘軀。老而不憊者。從可知哉。則於公爲知死。今懷遠以佳公子侍傍。又爲知生。在古人皆當傷與弔者。乃三復是狀。嘗善松年之能史。惟末憾曰。濟江將臣。功者皆相。而獨後公。方人固然。於及天之厚公者。則若未也。蓋列聖之制。職兵民者死。其子孫皆世之。變自世祖。奪職民者符節。易其故所死。其子孫廢而不世。惟職兵之臣。萬夫千夫百夫長者。父死子繼。世其符節。雖漢祖侯功臣之誓曰。黃河如帶。泰山如礪。國以永存。爰及苗裔。何以尙諸。其有

相而兼將萬夫者。詔俾自擇爲之。欲將棄相。欲相棄將。故其時有寧棄相而專將者。豈不以相能振耀一時。未若旣將可傳子孫。繹繹無究乎。幸公未相。相而亦蹈是轍。矧他人之家。世纔一人。而懷遠元兄忠顯。校尉管軍總把鑄。由從公戰鄂之通城。獲於敵。死之。及子回世。特陞千戶。仲兄史閻。亦懷遠大將軍。戍瑞州等處萬戶。獨一門三人。金符虎節。千里連州。相煥以華。則天獨厚公者。豈不多且遐哉。松年憾者。恐復爲公九原所幸也。公諱興祖。姓張氏。中山無極人。曾大父大父不仕。父林。趙州觀察使。改節度判官。丞相贈太尉史忠武公長萬夫。日隸其戲下。太宗賜金符千戶。老以公世。從大將察罕征淮南。能以少兵擊破其軍虎頭關。大將壯之。賚銀爲兩百。聞功於廷。賜人馬介冑裝具。宋開山南東道。制閫於襄陽。反寇洛西。殘盧氏永寧。殺縛其守長。憲宗詔以漢地兵專受命世祖潛藩。始置經略司於汴。屯田河南諸州。以忠武爲使。忠武兄之子。江漢大都督權。爲屯田總管萬戶。宿重兵於鄧。去襄二百里。兵信宿至城下。鄧甃其城。塞西南二門不關。吾袍甲車道屬縣新野西港。盡鈔于敵。府摘公將兵三百騎與步半追之。及之栲栳潭。令騎負一步。敵奮戈斧。謀折馬足。推步下騎爲陣。以待分騎爲左右翼合擊。敵錯愕無所於應。盡殲之。完得所鈔。戰次。馬嬰橫屍而顛。復騰而上。不知左股之折。已戰流血滿鞞。裹創輿歸。府迎賚銀爲兩百。錦二端。曰。未足旌勞。資市藥也。後敵攻新野。又大破之。白河口。中統建元。從史經略樞。援東川。假以總管。戍東安虎嘯一年。還鄧。戍光化州。漕安陽灘。禽唐都統。會中書左丞劉武敏公拯。開用兵端。大集天下兵圍襄陽。從城鹿門江西諸壁。戍焦山。敗宋援將張順江中。殺溺過所當。攻樊城。督造梯衝。又戰江中。火其戰。

艦斷襄陽。援樊拔移。攻襄陽城東。南當至元十年。凡圍六年。襄陽下。功陞總管。再官懷遠大將軍。副萬戶。明年。詔故大傅巴延。以左丞相。贈開府儀同三司。太保。并國武宣公。阿珠。以平章左丞相。阿爾哈雅。以右丞相。將大軍南伐。浮漢而下。郢治漢東。築新郢漢西。鎖戰艦兩城下。夾以礮弩。橫鐵絙江中。大軍擊拔郢北。黃灣壁。公實先登。矢貫左股。丞相手傅藥。拖舟入藤湖。達漢。越郢去。從攻沙洋新城。拔而殲之。皆負創先登。矢又中額。三捷功聞。錫虎符。從戰漢陽之沙。武口。陽邏堡。生獲其將鄭信。矢汰左臂。漢鄂既下。太傅將大師東。右丞留後。抽十六翼兵。俾公帥戍漢陽。公曰。吾戰是求。而顧責守。誰不能守。則無所施吾所爲矣。右丞則曰。漢鄂乘輿所至。視爲衝地。非材武足以先衆者。不可使撫安之。不得已往戍。聞荆閩遣安撫高世傑。將兵規復鄂。從右丞逆擊。走之荆江口。世傑窮降。詔移軍江陵。從攻沙市。因南風縱火。樓柵皆然。前登戰城上。又戰城中。蹀血濡趺。殲其軍。江陵精銳。於是焉盡。安撫高達。以江陵降。制置朱禕。孫不出。詔以世傑戰而後降。非其始志。斬江陵市。禕孫死。京師猶沒入妻子爲官奴婢。而籍其財。右丞功拜平章政事。移軍潭州。公爲鄂分省計事。潭留使督攻西北。凡三月。破石心臺。敵植木柵自蔽。或曰。火之可入。公曰。火易沃滅。柵必復植。且吾師暴處城下三月。土咸仗兵立寐。不如礮之。使敵不能隊立。得廣途。期盡十日。肉薄而登。可以逞志。平章是所策。十日。公果前登。樹旗陣牆。諸軍呼聲動天地。平章拊賀。謂諸將曰。非用張某言。而屬猶坐城下。安撫李芾。殺妻子。火廩舍。倉庫而死。潰軍集城西陳江岸。公涉淺方仰擊。飛石出城。傷頰墜水面。血及足。出戰益疾。竟走其軍。功聞。進官安遠大將軍。略地衡永。全桂陽諸州。撫其來歸。而誅

其弗率。又從平章移軍靜江。四十日拔之。宋餘孽益王。爵人號年海中。曰余復海嶺。諸州相煽以叛。潭之羣盜。在在蠶起。平章謂公衡。永全桂陽諸州。與潭屬縣。汝昔略定。盜今復蔓。汝其芟之。殲文才。諭七寨。斬祁陽令羅飛。主常寧簿黃必達。磔周隆張虎新化。降其黨蕭隆劉監軍。凡馘受僞命二千九百七人。縛賊百五十人。安集劫脅二萬三千九百家。常德路總管謀應僞先事。亦縛斬。功聞。進昭勇大將軍。招討使。監歸州。位總管上。又移監常德。仍招討。位總管上。西南夷爲梗。初詔征羅氏鬼國。會其既降。未至而還。後征伊奇穆錫。降之。以其王阿里入覲。賜衣服弓矢鞍勒。公平生殺虎數十。一日遇虎。一發而踣。語其友曰。生虎之髀。剔齒疾。可以已風。拔之。虎怒。爪韉裂。賴其氣息垂盡。不能傷足。由是人名公者。則加殺虎於姓上。至是以國言。賜名巴圖。尋詔萬戶各解使職。故公能招討。惟以萬戶將真定新軍。省檄戍衡茶陵。未陽常寧。兼督平永寶慶武岡盜。馘其跳梁者二百四十五。而伍其汙民。責使屯田。故來者不失業。公尙氣重諾。剛不可以威強屈。平章始終相從西南者。見其不可乘直之。醉或腰刀行酒。平章避入後閣。曰。公醉矣。戒左右善扶出。遇契己者。視意所欲與之。不少愛焉。其時諸將或集。皆下之。無有位其上者。卒以元貞元年乙未冬十有二月七日。年七十五。夫人卒。以明年夏四月十有七日。年七十七。葬以大德之元。丁酉於其鄉宋邨。九男。長忠顯。次戍瑞州萬戶。次鵬翼。僉嶺北湖南道提刑按察司事。次真定萬戶。皆夫人李出。餘皆幼。一女。適常某。五男孫。長武略將軍。世千戶者。金符。餘幼。六孫女。亦幼。銘曰。

詩歌虎臣。闕如虓虎。不聞拔鬚。視等塵塵。以之膽膂。秉旌遐荒。宣一西南。百年未疆。荊州之域。連城數十。

襄陽武昌岳及江陵長沙桂林取皆以兵餘郡傳檄反虜起狀介胃九年晝夜弗釋登危摧完戰必前列荆域底寧移兵夷洞來其降王槃瓠遺種矢石癯躬元戎奏功大帝一聞一官以庸迨其入覲嘉名天訓乃省在筭華其衣裳又敕尙方叢矢象房魚服鞞弓雕鞍金勒歸馬躡躡亦爛其飾雖古方伯得專征伐錫命之多將不是越憲憲其勞授報既多蓋棺龍光遺嗣尙荷二長萬夫一千夫長今代一門三將誰兩矧是萬夫一戍燉煌一殘關波鯨海是航雖基公陞亦遐以勩無差前人亦曰克世兩閒之堅莫石惟年可磨不磷載銘以傳

故從仕郎眞州路總管府經歷呂君神道碑銘并序

大德十有一年冬皇上淵龍遣正字呂洙以宮賓起燧於郢相與舟行浮漢而江明年至大之元始識從仕君於儀真傾蓋如素留止旬日禮甚恭情甚浹也又明年從仕卒洙自京師奔赴還持集賢待制趙忬之狀以銘墓爲託嗚呼禮曰知生而不知死弔而不傷知死而不知生傷而不弔在余爲知父於死知子於生可容讓爲君諱郁字伯文姓呂氏相之安陽輔巖人葬地與宋相魏國韓公冢相邇世傳爲蒙正文穆諸孫以遭宋靖康金貞祐河朔干戈弗靖者皆二十年生齒耗亡十七何譜牒之能存不可推采其次惟地江南今居襄陽者其系最完蓋文穆而上溫鎮頊韜夢奇龜圖六世下文穆者皆二名簡迺同伴希同夫間同之中同大與祖七世合之爲十三世祖下一傳紊且微矣東萊諸孫必續系焉今固不得見文穆葬洛陽文靖公夷簡葬鄭蒙休居壽州大寧大防在藍田豈居相者亦以仕家焉至今鄉人以韓呂二

姓爲是邦之望。皆優裕以治。時肇置江南諸道提刑。鄂屯實魯。爲淮西憲副。按行所部。凡他路幕僚之不職者。多被汰黜。獨以儀真兵事旣集。學校修舉。寇攘屏迹。鄉師里胥。推擇有倫。特加賞異。白之行巡省。惟得斯人。力爲薦汲。將加峻擢。後以僧格領尙書丞相。勢焰薰天。懼抑其志。貽悔後來。歸養寡親。築堂東湖之干名。以致樂。寧與細民逐利。什一爲甘脆資。有純孝譽。或勸復仕。則搖首不對。賓至則刲羊酤酒。相與爲樂。以不足日爲事。計歲有饒。惠及窮匱。丙午。江淮大饑。乃捐中統楮泉爲千者。踰十萬。州閭賴以不殍死者。爲口不可殫紀。惟不置田於郊。曰。吾寓公也。有是。則使子孫。以爲首。忘歸吾鄉。遣洙從張導江達善學。蓋文公之壻。黃勉齋饒峯師事焉。導江則受學雙峯。觀其必求文公正脈。名子以洙沂汶。皆取魯國諸川。明所願。則學孔子。末爲洹。示不忘父母之邦。皆可見其爲心不苟。操履之純也。卒以八月二十日。年六十七。歸葬其鄉。大考珍。在金。同知渾源州。考忠。登貞祐進士第。監稅於衛。金亡。反其鄉。悔德以卒。妣夫人李。亦儒家。讀書知文。於老佛學。亦造其微。監稅卒。篤君於學。太夫人力焉。妻韓氏。亦魏國裔。孫克勤。治內有惠及小星之譽。前公一年卒。洙克佩父師之訓。夫豈無自然而然哉。故爲詳此。使有傍韓呂合族焉。君賦資強敏。而嗜學。志爲世用。經史餘力。周覽治記。刑書算數。尤所神邃。策仕山東道提刑。令史詰姦。明允。雖文無害。宋平。轉兩淮鹽漕令史。是時。江淮新國。剋爲規制。抽戶爲工。散幣爲本。商賈雲集。舟楫溯江。遠及長沙。法簡政平。取不剝下。羨不罔上。賦入其時。上計於朝。授從仕郎。兩淮都漕經歷。方數千里之事。藁歸是幕。力所得爲。若善御之。得輕車熟路。便施弊社。功倍曩昔。會東征倭。行省責治軍旅。伐材造舟。鍛

刃餽粟與夫役民爲篙師火長百需之來其急雷電以君才優治賦必善撥劇乃轉爲眞州路總管府經歷眞州去征東行省最邇未下他州而先及者公以淵龍舊臣或踰分干時其乘雲雷以依日月不難也惟揆道循序表表中行亦時才之可虞者男孫一人女孫有歸與在室者如干人銘曰

丞相之貴禮絕百寮平章拜之猶體不搖惟於命官不敢堂帖必謹具階准勅以牒蓋尊名爵亦使其人知爲王臣自重其身品雖從事居下之上所職則要淮漕幕長袁海爲鹽立制禁姦通商惠民鯨利邱山控地之要亘數千里令速責成效於屈指隨以征倭改幕儀眞蕞爾一州行省日親軍與百需自近而賦其集有方益爾暇豫餘力及州役均校修逋歸犴清田無萊疇爲部使者收其德美上功於臺將置風紀時秉國鈞虐焰燦天故棄休居明哲身全事親致樂讀書教子贏資州閩荒歲救死在官與去爲惠則那矧子而才家聲克荷太行之東輔巖之里碣以表阡華爾桑梓

皇元故懷遠大將軍同知廣東道宣慰司事王公神道碑銘并序

三十一年將仕郎同知新州事王弼練服持一書通燧龍興客舍拜言曰此弼先人懷遠大將軍同知廣東道宣慰司事出處大凡與受代所由也中具歲上戰功自生二十五年世吾祖長千夫戊膠州以及至元三十年年五十六六月四日卒廣州凡在官三十二年膠州內地無事戰禦自四年用兵襄陽十三年宋亡與宋臣戰未嘗日釋介冑宋亡至十六年與兩王戰未嘗月釋介冑南海平矣與反虜劇賊戰未嘗歲釋介冑合是三者之戰凡二十七年中十八年三入廣嗚呼勞矣而官已是年已是命也今將以某歲

月日還葬吾鄉霸之大城孟邨先塋。得善史者銘其碑。我先人將不恨其無聞於地上。且懷德地下也。敢以哀鳴。公大參龍州李公亦曰。是公以鎮撫。事先武愨公於帥府。先公至地。亦至焉者。其事良然。乃序之。曰。王氏其籍大城者。不可世求。曾若祖。皆失其諱。祖令大城。考英。故參政張公榮實所將水軍百夫長。世祖錄其從濟江功。賜銀符。升長千夫。李瓊反。戰死濟南。二子守信守祿。公以死事臣子之長。故世銀符。長千夫。戊膠州。從築夾寨。襄陽戰。疾立功。換金符。登最樊之外郛。省旌楮緡百。戰江中。斷橫江鐵絙。菑樅。獲船三十艘。拔樊。生致郤統徐麟。省又旌楮緡百。從今太傅南伐。戰最郢之柳林。署省鎮撫。攻新城沙洋。獲船二艘。戰夏貴鄂之陽邏。獲船二艘。首功三百。錫白金二百兩。再以都鎮撫。從都元帥府定江西諸州。授宣武將軍。管軍總管。於時宋亡。其將相更立益衛兩王。故廣東不下。從破韶州。又敗方安撫廣之石門。授明威將軍。從擊文天祥於贛之興國之空坑。止其妻子。散降其衆。略盡。禽前鋒趙時賞。帥府改行省。從右相至廣。張經略集戰艦二千。海珠寺擊大破之。獲其艦百八十。斬首不可級計。再授明威將軍。衛王死。入覲。授宣武將軍。虎符。還戍廣。取葛岬洞崖石砦。殲李梓。發兵南安。別降林桂芳昆弟。新會。登南海軍三千人。生致其帥潘舍人。歐將軍。僞署置官。自王親遠。遣馬帥陸帥徐相襲廣州。皆擊破之。斬是三人及其軍千平十數壁。歐走如新會。令黎德德已集船至七千艘。衆號二十萬。其別將吳林以八百艘圍馮邨。先是公嘗抽工於軍。伐材於山。不資公帑。爲戰艦三百五十。烏船五十。載是戰艦。德林衆大潰。沈死海洋。生致黎德歐王。與僞都督丞相兵馬鈐轄二十四人。皆磔之。椎其僞符璽。召入。賜衣服弓矢鞍勒。加懷遠大將。

軍同知廣東宣慰司事三敗東莞盜張強三千餘人首功三百歸所掠人畜其主廣盜少贖其使入覲恐公受代以歸預乞尙書宜留再授懷遠大將軍同知廣東道宣慰司事降循盜古尾郎長樂自宋亡十四年招不能至者版賴勝立興寧廢縣以宅流民又斬汀盜轉入梅循者鍾明亮官并吳禽三首而壞其羣最斬盜爲起廿九二百七十一人今著其尤魁驍者皆鄰省連兵頻年不能加誅公必取之廣之屬州皆山險不可馬至梯崖絕谷逐索水則乘鳥船遊擊之不盡不已其爲什爲伍殺人以剽財之倫皆削棄凡是諸盜名若可易而顧難成功至今有未靖者老將論者曰丈夫死登陴陷陣猶足爲名澤及吾妻子今橫尸草竊手與經溝瀆不異亦足嗟哉此觀望不屑蔓盜所以也反究公心忠勞如何廣之屬州若士與民及聞今代爭狀於宣慰廉訪兩司功其盜弭民安願留公使以殿南荒行省擬聞代踰一時而卒惜也夫人石氏子三人弼也知彰其親者非文不遠亦旣克子矣餘未名男女孫皆一人幼甥有戴德仁者舟從至南康燧書以還可尙矣銘曰

生北海濱卒堙魚溟萬里歸棺低昂絳旌維之南溟其險不測其北嶺嶠羣盜攸宅嶺嶠何如峻削剽空羣盜利之自王自公凡在勝國敢曰難令與今吾元跳跟豪勁公有砧斧腰領汝膏十八年中無有幸逃或曰公哉始勞襄漢終覆武庚椒洋無畔不是之書逐盜諄諄大棄錄微奚示後人曰訖炎趙猶遺兩孽噓爾死灰乍然已息公與樹功帥從相從貪人所同公差有躬維祝融墟實漢南越大兵艱施小兵弗讐鄴無賊良公功之私廣人戶知今思永悲曰潛昭幽丞太史職載銘不亡有穹斯石

有元故少中大夫淮安路總管兼府尹兼管內勸農事高公神道碑

至大之元。高氏子璉。手其家乘中載。教孔孟三族。楊潛齋庸。孫洧陽希猷。太子諭德蕭勤齋。爲其考少中公之序。之行狀埋銘。丐太史公牛馬走表其墳道。所未識者。獨孫洧陽。若潛齋勤齋。皆走所友。其文自足。昭今而信後。而走綴言其末。無乃願爲先德累歟。以故久未操觚。後思其公都漕河南。我先世父少師文獻公行省於汴。公來受約束。於下執事。走嘗還贊焉。再都漕關中。走時秦邸文學。相接之數數。又非昔一還者。矧聞璉也。常師事同門人劉憲。副存齋季偉。曰善篤學力行者。可虛其請耶。遂序之。公世平山人。諱良弼。字輔之。祖俊民。妣吳君。二子。進林。進金。鎮國大將軍。守滑倅。太宗大封同姓。國母弟睿宗。眞定。享國不延。莊聖太后。主是分邑。置規運庫。林爲之使。其歲上供。子息蕃多。而家亦殷昌。妣門君。三子。公爲之冢。就傳讀書。端重異羣兒。會眞定火。延燒千家。言之庫使君。是灾幸不及吾家。吾力粗可。盍發財以賑。君聞。擊節曰。及物之心。見於髻稚。他日大吾門者。將由是而行如其言。旣冠。宿衛世祖。潛藩。後正天位。盡付全趙財賦。聽其綱紀。而歲登贏。時天下困於鉤稽。公以全趙獨遺。入請亦置計局。帝曰。世所困者。汝獨求之。可灼其無有欺冒其間。至元改元之明年。官奉議大夫。同知南京都漕。錫之金符。六年。改使河南。拘權稅課所。其年。仍河南。升都運使。他道爲使。惟知徼寵專利。賊下罔上。以自私。盈路怨咨。莫之省恤。獨公軫歲旱荒。發庾下估。市粟以濟其饑。大爲醮祠。以禳蝗孽。斯皆職民者宜爲。而治賦臣。顧先之。俄然天若悔禍。雨澍蝗死。人則詩而歌之。冀采風謠者。取上聞也。又以用兵襄陽。賦河北諸路之民。轉漕。人畜勞斃。而

粟至者亦絕續不時公請增直以糴則人趨利自至以賦民漕功將倍蓰省行其策由是軍中困廩充溢或露積不垣滿秩官朝請至鳳翔府事治民安思永利之乃倡民導泝水起遙望盡閘底五十里再冬而成既田三千畝水輪十七民之圃蔬園藥者又井井乎其濱岐人惠之姓爲高渠僉憲劉仲修按行其地賦詩勒石紀功安西王開國之三年詔許凡官關中者職與不職聽其承制遷黜由是升中順同知陝西都漕其使郭琮恃其獲上且阿中盜殺臣雲巴勒肆爲非法公與連署凡賊國病民賈禍者縮手避之琮敗獨無所汙朝廷恐其屬偶逃連坐遣使深驚者數輩鉤稽簿書於公無絲髮得遂家居教子樂賓或縱遊山水勝地以自適二十有四年制下其家起以少中大夫總管淮安是郡前以征倭責治海艦歲市材萬富商恆大其直通有司分入其利積材已十三萬下車吏又發郡帑四十萬緡如歲例續市請署公曰已市者足支一紀復市何爲下吏於理飛書上列以爲徒爾耗蠹縣官富商恐壞其姦夜持五萬緡以禱公曰若欲如他人貨取吾耶吾不能同汝爲盜叱去無幾時行省報竟下如數收市公嘆曰吾言不效於是商尸位何爲壹鬱發疾以卒實歲丁亥二月二十有一日也年六十有六公軀幹魁頤風度凝遠望之已知其不爲人下者矧其秉德易直剛而不競柔而不撓友善日親惡不急去真善應世務者元配夫人邢君前公卒繼配夫人董君後公十年卒姻里皆師其婦道母儀五子琬璠珪瑾璵璠由任子尹宜陽後公三年卒璠中殤珪以海船總管戰沒交趾三女歸成都三務提領閻郁湖廣行省郎中郭孝華州判官魏餘慶孫男一思誠女三歸王秉餘幼曾孫男三女二皆益幼公初葬真定後十九年子璵以公生樂家

秦沒而魂遊遠也。徙之長安縣華林鄉。祔兩夫人。而璇璠皆從。窆新兆。公弟良輔良佐。輔三子。璋珣瑄。居汴。佐二子。瓊玠。居其鄉。銘曰。

姜齊之苗。食采於高地。以姓之。其來也遙。其系其傳。文字無紀。今其可推。纒祖焉爾。全趙金湯。千里其疆。誰之國之。繫我睿皇。考居其閒。斗食自晦。入出金粟。克當其會。再傳而公。世皇飛龍。闕

牧庵集卷二十四

神道碑

武略將軍知宏州程公神道碑

由程氏世爲太原祁縣人。燧考歐陽公表唐相。系曰程出風姓。顓頊生稱。稱生老童。老童生重。雖其後世掌天地之官。裔孫封程爵伯洛陽。上程聚則其地也。至周休父失其官守。以諸侯入爲王司馬。及銘文簡公琳碑。則云莫盛于唐。宗分爲七。廣平中山濟陽靈洗。其三則皆祖魏安鄉侯昱。而系表皆無是言。惟异上三四世而止。豈今居太原祁者。或廣平中山分歟。其可系則自其高大父主簿祁政。生曾大父禮。武科取官忠翊郎。至右武大夫。守隆州。冒陳金兵以歿。宋愍節死。賜錢百萬。歸葬其鄉。大父天祐。醫以自業。卒葬文水。考達以太祖建龍旗九旂。卽位之年丙寅。至戊寅兵金之年。爲十三年。年二十餘。與兄通弟進。倡豪傑來歸。完保其鄉。爲提控。爲監軍。鎮撫軍民。都彈壓。管民總管。銀符甲午。金亡之明年。還鄉民五百。亦占屯籍。詔易金符。位總管上。發平陽河中京兆民二千。屯田鳳翔。實僑客。其地城中猶荒。錯荆棘。逐虎狼。則田疇非立芟舍。伐株櫟。芟蒿萊。不可以入錢。鎛以觀銍艾。芟其藪哉。矧西則秦鞏。未臣行金正朔。南大散關。距宋百里。北山饑盜縱橫。日夕相寇殺。丙申。又爲征蜀所塗。師旅去來。館餽之須。十以率之。屯供億七。鳳翔纔三。後鳳翔民稍集。資屯猶六焉。爲之七年。當歲壬寅。以終其賢其能。其勤其勞。有盧昭文摯。

墓碑言公諱介福字伯祥故事父死子得嗣爲歲辛亥宋四川制使余玠潛遣偏裨火絕棧道木閣身將大軍攻圍興元城方孤圍公將屯兵五百從都元帥都爾蘇入援及絕無從得塗值三人自圍所亡歸許貫其死令導由他山刊木出陳倉玠以爲自天而下焚圍宵遁其年憲宗卽位凡中土列聖符節告身盡收之官明年入覲還金符仍位總管上屯田鳳翔制許專殺有王姓民毆兄至死旣就逮其親請鄉鄰善公者懷白金二鎰來貨曰死非他人吾長子也今又以季子償死吾誰與爲養惟哀而全之公卻金曉曰虎狼獸耳父子兄弟且不相噬人而賊殺同氣其不仁也暴甚虎狼此而不誅何以正是邦之數敗天倫者竟尸之市尋岐雍民家奴皆蜀俘百十爲曹相煽亡歸公悉止還朝廷聞之率以爲反遣特濟來按事連其主將盡殲之公曰民奴羣逃主何與知惟當罪首亂者由是惟誅七人孟待制嘉之因扁其堂曰明恕戊午憲宗進討西川乘輿入由鳳翔多其津梁館餽廩修治豐潔賜金幣五白金爲兩百五十世祖立極中統庚申收上符節告身如先朝以前屢入覲潛藩熟公還金符至元四年丁卯以平陽河中屯民爲軍假公子松長千夫將戍成都其還鄉民五百人傳官公武略將軍知宏州下車渠桑乾水灌田五十里新州廨以示安榮一刮夙昔苟簡之弊饑封州民所食木膚草實上之中書得發廩以贍械素豪猾之于治以病民者于市懲衆擢曹徵君子汝弼教授以師是邦使士知學其古人所謂糾姦示惡流恩褒善者類歟十年四川上松戰功制問故符安在對以宏州仍佩制解傳松滿秩還岐二十有六年己丑年六十七冬雨水冰羣鳥噪集庭樹三日公弗善之覽鏡入奩前諸子訓曰吾平生無他長人惟俯仰無作愧

人耳。若曹可篤學。學自修。則在家在邦。不患無孝忠之聞也。惟求善惡在己。有無無以人過于毀譽。而輕愷易喜。語訖而卒。實十一月二十一日也。二月。從葬于其考鳳翔之召亭鄉兆次。兩夫人皆前卒。謝君四十年。富察君二年。四子。長松。次檜。八藩。副都元帥。虎符。皆不祿。悌彬。業儒。孫五人。萬里。秦山。殤。壽山。業儒。文演。陝西萬戶。虎符。文饒。未仕。女十人。皆歸名族。其天質仁厚。剛方。孝友。明信。哀孤。敦宗。民奴禮士者。有陝西賈提學某墓誌銘。銘曰。

猗歟將軍。賴某父勳。田岐雍郊。千耦其耘。人初小之。治寄是府。勢若異然。此客爾主。後一歲中。校其賦輸。爾財四三。此六七居。無事而農。我艾我鉦。警將一旅。從寇入出。憲廟兵宋。師由褒斜。百須餽供。應求咄嗟。帝用嘉止。幣金實篚。其爲龍光。儔與儔比。于後世皇。詔其子松。將屯千夫。戍鄰葑邛。其半屯民。雍岐之界。私公刺宏。足乃騰驥。乃渠桑乾。膏潤孔多。履道以仁。越度用苛。視民之飢。猶己糝背。亟請于朝。發廩以食。滿秩養安。十五餘年。靈鳥告凶。得氣之先。觀古史臣。爲人紀善。雖一行言。亦取立傳。志在行後。尙鑒用勸。子孝孫慈。乃祖考思。惟懼平昔。有美棄遺。託諸能言。金百昭垂。走非其人。彬爾來卽。拜手過求。先德爲述。誄婉而章。其言洋洋。匪資礎龜。疇遠闡揚。

譚公神道碑

譚在周千七百國之一。子爵。幽王之譚大夫。衛碩人之私譚公。皆其遺苗。後世子孫。遂以國姓。史代有人。其居德輿之懷來。高祖而上。不得其世。曾祖信。金鎮防壽州千夫長。祖伯全。家累千金。父資榮。以徇北功。

皇元帥左都監虎符寄治交城。遂令其縣削平盜賊。賢士逃亂者多往爲依。公生以歲戊寅。髫年入學。穎慧彊敏。拔異羣兒。成人兆緒。嶷嶷則見。十五綜經緯史。講貫精熟。會課朔望。每魁諸生。爲交牧盧帥所奇。以女妻焉。軍中得書。則馳送之。故其家多積。至萬卷。國初爲制。皆世其官。父死子繼。兄終弟及。或父兄存。將傳子弟者。亦惟命。故考府君以元帥左都監交城令。推其弟資用卒。公以嫡長嗣。爲十九年矣。太宗之八年丙申。州縣守令上皆置監。動惟國言。公不能也。而受成說。譯人慮其見欺。乃私與國言者遊。日薰而月聒之。滿歲而悉能精曉。他日郡議。不資用譯。應務無滯。人悉異其不學而至。朝廷置斷事官于燕。曰司瓊林園之臺人。人則曰行臺府檄公往計事。歸請省諸工料費。橫取民者。府僚便之。舊文谷水分漑交城。爲平牧郭帥所遏。專利其縣民。累訟之。終不見直。躬造大府爭之。郭帥少公。恃爲父執。至或肆詬。公不爲報。惟理譬折。彼遂噤屈。至今其水縣蒙其利。杖部民持吏短長。恣爲非法者。幾死。民惠且威。俄入覲。因中書耶律公面陳。初乙未。料民州縣。率以無產僑客入籍。用示其庶。及賦下。悉避逃徙。責徵實存。官無所取。稱貸賈胡。困不能償。迫改立約。以子爲母。譬以牻生牯牛。十年千頭。滋息日增。帝爲哀之。制許贖其逋懸。無鉤見民公私之負。三年勿徵。子母對止。亡民能歸。其復三年。縣境大甦。而鄰民曰。吾獨不居交城。耶州縣守令益害其能。請督一府遠輸之糧于平陽。及至。又移輸京兆。仍守其出。比盡而返。數年。由是縣民困劇鄰矣。憲宗壬子。復大料民。公削其逃徙。兼其貧弱。雖捐戶數。故是縣差不艱窘。歲甲寅。世祖淵龍平大理。還始入見。嘉其舉趾凝重。出話慎詳。留居藩府。官而不名。以其弟山阜代爲縣。遣邇臣出使。必以公偕。

先是分封世祖以京兆田戶寡益以懷孟且詔總天下之兵遂置經略司于河南宣慰司從宜所于關西行部于秦州漕運司于衛安撫司于邢盡遣諸軍屯田戍邊首淮尾蜀以休秋冬士馬往來之勞東西數千里道不拾遺中侯屯庶翕然歸心歲丁巳宗親閒之遂解兵柄他王遣阿勒達爾至京兆大集汴蜀兵民之官下及管庫征商之吏皆入計局爲條百四十二文致多方旦曉衆曰惟劉萬戶史萬戶兩人罪請于朝蓋謂忠順公丞相忠武兩公也自餘我到專殺虐焰薰天多迫人于死世祖遣庫濟青左丞與公來臨無與鈎考而彌縫其閒時通動息藩府會明年世皇身至帝所命下而事始緩猶仗兵民諸官凡昔所置諸司皆廢公歸丁妣郝太夫人艱藩府奪哀起之世祖始分兵南征俾公治懷歲旱復鑿唐溫渠引沁水河內諸縣中統建元制喪其賦性寬和練習政事以爲懷孟路總管明年入覲賜金符四年換虎符訟隨日決會不留獄教民植業桑疇麥陂稻塍芡湖果圃苾區水輪步船無有遺利或用致饒民其臧獲侯克寬孫宥等家男女數十人引蕭讓爲府史升知事積官連使按察使至元二年罷世侯省懷孟衛輝兩總管入彰德以公爲同知無幾時官嘉議遷河南路總管兼府尹明年奔元帥府君喪交城中書不聽終制迫懷洩職瀆水壘石爲岸梁木其上歲易腐敗規爲樓十二楹覆之慮其財擅取帑力輕用民得請戶曹而始究工上下列肆月收傭值資府公須參政楊公紀績于碑官少中平灤路總管既至疾歸七年散階例降二等與職上下官奉議司農少卿尋進嘉議京兆總管兼府尹者一年改陝西四川道提刑按察使當按行四川以邊方軍政多所闕略未可以內地文法遽繩修舉大綱而止州胥府史坐贓污者以始

犯罪皆輕平。下令治事之餘。使學官聚爲講解。期通一經。庶少變其筐篋刀筆之習。漸摩禮義。則恥貪洩。而不敢蹈。時詔禁有妻妾。乃建言不孝有三。無後爲大。世德下衰。婦人以悍妒成俗。已旣無子。又以是訐制其夫。將遏絕苗嗣。曾不省恤。請自今男子四十無子。聽其娶妾。中書是之。遍示天下。十年。中書左丞咎順。時爲宋帥嘉定。入寇。大敗僉省嚴忠範于成都沙坎。入其郛。我帥退保子城。上械忠範至都。俾公代爲僉省。至則瘞其暴骸。完其焚屋。賑其飢貧。集其流亡。撫定一年。西南夷羅羅斯內附。上以文武兼資。可使鎮撫新國。以爲副都元帥。同知宣慰使。還京兆治裝。或說蠻夷無親。不常叛服。宜以老疾辭行。公曰。受國厚恩。圖報無所。以皇上之威德遠被。何往不可。何私自幸其安乎。就死其所。懷人德我。馬革裹骨。歸窆是焉。志願畢矣。遂行。未至。行囊盡爲河西所劫。事聞。上慰安之。再爲降制。及軍中所須。至其境。方諭皇元同仁。不問遠邇。特置大帥。安集招懷。以捍外侮。非利徵求。朘削汝也。國人大悅。而公以不能風土。竟疾卒。至元乙亥九月二十有七日也。年五十八。門塔李某護其喪歸。子克修迎之中塗。號慟屢絕。懷路之民。哭柩致奠者。將三百里。以明年某月日。葬河內某地。後踰三紀。公之孫質拜而言曰。君及知先祖。且與先人同事。許文正公。求可銘先祖碑者。舍君焉。將誰託筆。燧曰。嗚呼。公奉命始至秦。于時識之。其後尹洛。燧時家洛。遊處必見。召常謂忘年友。雖辭而不敢居。抑不可不謂之知己。于其平生。若可概焉。子之言曰。惟仁者能好人。能惡人。蓋先師以初入潛藩之年。驛召至秦。後四年。公使至。見其道德之容。聞其仁義之言。考其卓絕之行。憂世之志。樂天之心。出謂人曰。今顏子也。先師還懷。公爲之牧。以求言焉。則謂之曰。學者

或滯于形迹而不適用中理。合而一之始可謂善學者。猶導公以用世之方。身親接久而始示以性理之妙。而操修之。又使克修盡弃其學而事之。其能好人也如何。默爾吉爲監于懷。以暴戾跋扈名聞一時。同列少逆其意。或詬詈侵辱。不異僕隸。公與處八年。細故則讓。事或害政。則誠意馴導。以理使孚信之。能改而止。惟遠以不惡而嚴。又游顯代張左丞宣撫大名。爲諸路總管求金符。奏已上。公言之中書。辭不受命。曰。聖上不識譚澄耶。爲顯所舉。省爲去之。其能惡人比類。亦庶幾其仁者歟。太師趙國劉文正公論天下人。牧得邢之張芸夫。懷之譚彥清。何憂不治哉。先師亦言。譚侯辭氣溫雅。雍容樂易。達時識治。足畏服人。其爲兩公推與。華袞之褒。何以尙之。夫人盧氏。勤儉惠和不侈。旣貴能以身率。不輟婦功。故婢數干指。約束如一。壺範之嚴。所至化之。克修事裕皇。出爲江南湖北河南陝西漢中三道提刑按察使。秉受懿美。得之天。問學修爲。受之師。忠信愷弟。臨政與人。皆踐其父武。女九人。適淮東宣慰使傅爽。延川令李某。湖南書史石某。江南榷稅使賈時益。汾州萬戶子杜某。杭州總管子楊某。澧州總管子鄂屯。某參政子盧某。交城以次官子王某。男孫三人。忠尹大名之南樂。質宿衛成廟。已銓未除。文庶未仕。女孫七人。適湖廣省員外郎袁景韓。知陵州杜明。耶律太傅濮國公孫某。東昌總管之孫宿衛成廟許誼。宣慰使子傅蔓。閔某。竇某。銘曰。

有翼其恭。有溫其雍。有訥其言。有裕其容。人有其一。足曰善士。矧公兼之。宜克用世。魯昭十九。猶有童心。公于其時。帥政已臨。視民之傷。猶已致者。奔走不遑。說上教下。事大定憲。由邈皇居。與率七臣。衆以視諸。

入侍大帝。藩府帷幄。而日迺與。俊義。造擢。凡厥大猷。亦與有聞。權臣肆虐。恃解其紛。大帝南征。歸正天統。于懷于洛。于灤于雍。于是有衆。迭司牧之。惠績寵嘉。虎節陸離。追之風紀。詰姦秦蜀。惟政以仁。不一文律。嘉帥縱兵。入寇成都。劉吾人民。災其外郭。奪嚴諸侯。于彼僉省。以公代往。責使撫定。安鎮一年。移師西戎。皇威甫張。而遄告凶。最公之仕。歷年四十。其二十年。爲帝賞識。矧其有子。官風紀三。其取于天。而得已貪。走賦是詩。錢石墳道。期爾後昆。百世是保。

轉運鹽使曹公神道碑

維曹肇國。則自文王子振鐸。以武王弟。故與唐康管蔡霍屬。以別之。鈞曰叔。春秋十二國。曹猶存。其後子孫雖散之四方。亦皆曰吾先人。顯諸侯。捨姬氏。惟國姓。至參以沛吏佐高帝。興漢功。侯平陽。國故絕。或續。魏文帝丕。纂漢以有中土者。凡四傳。四十六年。自是聞人。史不絕書。至金初。曾祖儀。貫籍。雖之考城。以明罰執法。爲郡功曹。生蔚。解試魁開封。生鸞。以材武。受知皇元帥劉公。引爲天下規運提舉。妣夫人赫舍哩氏。金源貴族。生公諱世貴。字仲明。由翰林國史院書寫。爲元帥府提控。初高麗自太祖世納款。而幽王穆呼哩方總兵。歲東征不休。虔劉人民。而臧獲其子女。高麗患之。棄王城。徙其民江華島。世祖哀其首服。爲罷歲征。使復王城。今瀋王之祖。惑其令公林演之說。而安其所。不以時徙。帝怒。命嗣國王塔納格爾兵。其界遣平章政事趙璧。行征東省。公爲行省宣使。入諭。演與同惡。豎惟茂禮書宋松禮侍郎洪素。陳兵以逆。公叱責曰。汝海邦小夷。敢以威脅天子之使。則反矣。戮十餘人。縛演致闕。國王導之入覲。帝嘉其忠。敕授

忠翊校尉曹之城武令。有惠其民。勒石頌之。凡三遷。皆同知劇郡。吉州歲荒。發庾以賑餓。羸隆興羣盜據華洞。數調官軍討。不能平。遣公諭招之。悉棄險來下。皆齒平民。建康去以母喪。會廷議。凡前峻官者。例陞之。改溫之治中。以未終祥禫。辭。明年。官朝列。福建閩海道提刑按察副使。職乎民者。進爲風紀。非聞望出常調者。憲臺不輕以昇。至則紕閩省平章。默勒賊民蠹政。下詔誅之。彼其同列。大爲振肅。滿秩。官中順。遷興化路總管。兼管內勸農事。凡民爲羣盜鍾明亮劫脅污染。進討將士。取而奴者。無慮千人。皆汰之。遷福建都轉運鹽使。未上而卒。實大德六年六月二十有九日也。年六十一。葬太平之須城。登賢鄉。夫人趙氏。南京提舉趙晉之女。妻道母儀。姻里範之。五子。定國。尹江陰州。兼勸農事。靖國。同武昌等。榷茶提舉。皆夫人出。次室葛。正國。安國。輔國。皆葛出。方勵學。女孫三人。銘曰。

率士之逖。將帥侯牧。有沒其齒。天威不覲。公一布衣。從省東征。問罪高麗。負羈以行。檄先俘海。徙江華島。敢拒爲亂。魁脅縛討。王孫導之。入告爲猷。甚爲帝嘉。邑令用優。既試牛刀。易猛以惠。尋峻其階。吉洪昇倅。言拯歲荒。洪咨諭降。持憲于閩。渠兇斧亢。爲牧興化。凡寇滋蔓。波汙平民。悉賴以澣。轉而閩漕。鹺利是專。甲子方周。白日遽捐。平昔履歷。盡萃乎此。在邦必聞。可無媿已。而所未白。在家亦聞。衰俗滔滔。在官幸身。親未卒哭。期月已出。王事是從。笑言自若。公則異諸。昇護輶車。改溫又辭。練服未除。若是自致。庶古少跂。化民興行。足裨至治。須鄉登賢。而祖有阡。碑以表之。庸信其傳。

少中大夫孫公神道碑

至元二十有三年。燧以直學士召至翰林。孫公時爲閩省郎中。數千里狀其考盧川府君之行。將託之石。見求。旣爲銘其墳道矣。大德四年。爲懷孟總管。且卒。願言其子壻郭忠恕曰。死必求姚翰學銘吾碑。至大二年。燧方承旨翰林。忠恕其時已爲宗正府郎中。始致是婦翁之命。嗚呼。何公區區不鄙余言。若是不忘也。公諱顯。字榮甫。其鄉望遷徙。考妣年葬。兄姪名爵。前述悉之。公幼學。旣長。以其家隸兵籍。歲從大將南征。世祖立極。置江淮江漢兩大都督。東則李壇開闢益都。西則史權開闢鄧州。與宋揚州襄陽兩制帥掎角。及瓊誅。廢督府。皆爲統軍。至元五年。大集天下兵圍襄陽。起本平宋。八年。敕統軍駐淮北。實制下流。西擾之兵。明年。改行樞密院者二年。改行中書省于淮之西。十年。襄陽下。廢省。復行院。明年。丞相巴延行中書省。將大軍濟江。又廢院。與是省合。公以從戎捍敵。應變倉卒。益示暇豫。未嘗窘錯。故由書吏至令史。數年不調。宋亡。明年。積是勞勩。官中順大夫。遙授知英德府。同知太平路總管府事。又明年。改江西行省。郎中。宋餘孽兩王盜據廣海。遣將給餽。凡其征需。動咨幕畫。隨亦殄平。十八年。官少中。同知荆湖北道宣慰司事。朝廷遣使鉤考錢穀及侵牟者。遂大徵集諸道官吏。無慮數千于鄂省。責公主計局。其使善煩其令。爲葉甫定。則一易之。傍求多塗。約束計吏于行苞直。公衆辯曰。冊已具矣。何至衆多爲是。持久不絕之務乎。有絲髮遺罪。請身任。使爲之止。其不屈威暴如此。乃歸計吏。二十三年。廷議以平南國升秩過峻。例陲公爲朝列。遷福建行省郎中。以犯法。臣陰狡貪賊。盜官楮緡十三萬定。能正而不阿。卒無所染。明年。以價格爲丞相。爲尙書省中書。六曹悉以歸之。而鉤考尤酷。省臣而下。或杖辱。而閩中獨輕平。未嘗若浙省。

迫人于死者南雄械賊百餘人爲草竊者當死公讞之惟刑三十人他悉縱遣安溪賊連十五砦爲寇公諭下之省議苟下惟罪首惡至是下者數千衆欲盡屠壯士分有其子女公拔劍止曰省議云何敢掠取者論如律惟磔首惡一人大德二年復少中大夫懷孟路總管兼諸軍敖拉兼管內勸農事民蒙其利者惟竹始竹之徵利財自戊戌宣課所惟在洛西懷與輝舊皆民產由馮德用爲河南漕長以兩郡之竹妨其課利請官有之制國用司爲奏可而禁之法密雖其故主輒取一箇亦坐以盜數其節爲布罰園傍之田民耦耕侵犯而出亦止爲罪民甚害之官使竭園伐取竹日益耗而課入不除公策于部請令故主與鄰地獲守無禁斬伐惟責輸賦是亦復民產之漸也符下從之今鬱爲茂矣譙樓庫舍廟學有老弊者無不新完諸王妃主經郡賦民木席爲屋絡綵周之晝食夜息各異爲所或前期一月具而不至民又守視不去去又官吏規取其物無所干訴公至製卉布爲大幕容倍百人可以離合卷舒旣便以輕載以十車之力送往迎來無不至所皆前政未爲者病革猶臥治事卒于郡治仰崧堂之別室是年秋九月九日也年六十一夫人程卒以至元十八年繼夫人楊卒以二十有三年今夫人李嘗剖股肉羹進覬已其疾斂則斷髮納柩中示與同穴子五二十有年長某舟死江中次某以任子爲單州州判官餘未仕女四長程出郭宗正妻今寡次李出適智某餘幼銘曰

崧高詩言峻極于天維嶽降神王不時巡而公之先世家其下其仕其隱譜無究者及公之生珥筆從戎志期振拔以立事功周旋統軍行省行院雖屢易置爲史不變以才見留謀資其優逮夫濟江勞力大酬

英德太平遙領知倅官之中順副以金瑞尋于江西長省幕僚進而少中其秩益超轉而荆南同知宣闔奔走聽命踰十名郡例阨始躋朝列稍卑于吳于閩省幕再爲後移內地理問汴省復其少中總管懷孟平生履歷其止于斯治兵涖民何事不爲爲則事治有譽無刺其子爲臣亦盡其義其所卒地郡堂仰崧何公于崧生彼此終豈人之爲造物者意歸安崧邱後昆以利

勸農使陳夫人李君神道碑

少中大夫嶺北湖南道肅政廉訪使陳元凱語其妣夫人平生于其友姚燧曰河東李氏有開國于金爲金吾衛上將軍者子孫雖世摺紳多顯人人不目之惟上本其先曰李金吾云夫人則其諸孫陝令欽若之女先君勸農使將授室祖考妣規措公賈潁川郡君審于采擇聞夫人淑姿懿行布幣聘之夫人旣廟見吾陳氏世緒絕遠族大以蕃先君上有參議提學奉職三兄善于閨壺修職謹事舅姑孝之娣姒友之姻戚睦之而僕妾恩之咸曰非漸涵姆訓有素不若是以履度循法也歲壬辰規措卒天兵勦金河南獨奉職以詔使死亂他族皆完自洛之西徙家解梁夙所居積蕩無遺矣會歲大荒夫人擷糶爲糧然火照續以事潁川雖流離造次其故家遺風不衰平時二年而潁川亦卒參議與張夫人嫂也事之如規措潁川先君參謀軍中或自軍所來囊之一錢尺帛不有之私室必歸兄嫂先君求得奉職二孤女民間夫人子過所生歸諸令門元凱生有三年不爲天所恤以歲丁未四月四日卒年三十四葬之崑山先塋亦賴天之靈獲託其遺體者今白首矣每悼夫人棄世之早前先君二十四年先君後躋位光顯不及同其祿

而元凱之仕則濡先君休澤者祿養滋不及矣。今惟有表章德美。于是金石以慰靈下。泉開示子孫。于方來者。猶或及焉。敢屬筆子。燧曰。吾姚氏與陳同姓也。燧之曾祖妣。亦李金吾諸孫。不知于夫人姑歟。又戚屬也。此燧不敢以不文爲讓者。勸農使諱膺。夫人二子。元凱元英。英殤。孫坤。女孫二人。皆有歸矣。銘曰。良農于穡。天勤其力。或報之秋。秩秩夫人。來嬪于陳。百罹艱憂。君子中道。弗偕其老。年復不修。何天陰隲。裔施淑德。貽子是酬。持斧繡裳。風紀四方。民瘼之瘳。爲時聞臣。人賢其振。誰異其謀。壽母之子。名不世齒。泯泯堪羞。刳首之禍。有美枚列。以表阡邱。

牧庵集卷二十五

墳道碑

少中大夫輕車都尉渤海郡侯解公墳道碑

至元三年武宗若曰內外庶官五品而上既皆宣授于其子孫亦光顯矣而其祖考猶或布衣歲時廟享工祝致告無所稱謂非所以興孝天下也乃敕省臣列五爵三土加階勳而等威之五品子男從男正子者縣四品郡伯皆惟考一代三品郡侯父及祖二代一品國公祖而上遞衰之至曾爲極焉惟喪詞用御前寶者以其名聞他如宣授用是少中大夫祕書監丞解節亨之考禱贈少中大夫輕車都尉渤海郡侯妣樊渤海郡太夫人祖政祥中順大夫上騎都尉渤海郡伯祖妣樊渤海郡太君節亨將昭聖代禮使臣下之美且侈吾家之美希闕之遇樹碑先塋託筆于燧因惟前古不及三品者不以封諡揆今爲制下及五命至德深仁爲何如哉揚厲張皇史臣義爲故爲解氏略其遠紹惟始上世諱元家真定者有子十有二人高祖諱徹登金進士第五子曾祖其季諱信當金末世爲真定綾錦院長官娶安氏實生中順安卒繼娶密氏國初徙所領織工將度漠道卒野馬川中順事繼妣以孝聞讀書力學強敏兼人淹貫經史尤邃易學傍及天文歷法靡不精究金棄河朔全趙已爲元有會武仙殺都元帥史天倪以成叛而臣金由太君爲高苑金武義將軍女霖之女遂避地高苑歲戊戌太宗詔試多士中是選者復其家中順以易義

登第卒年八十三。肇瑩殯之渤海安豐鄉之東原。太君卒年九十四。曾祖死遠役。柩不得歸。別製衣冠。呼其魂。合會妣考妣兩世皆窆是焉。二子祿及少中。惟少中樊出。誠篤而多學。爲軒岐言。是邦疾者。特爲司命。擇師教子。恬忽時榮。歲荒。則發庾贍飢。凶喪急貧。無待見告。賻而周之。則吾所儲。如彼外府。少不留吝。稱貸遲歸。火券罷償。部使者經郡。觀省民俗。必以其事上聞。其章不計。堂帖有司。大書其門。旌曰義士。詞垣之臣。賦詩交詠。凡是鄉閭。無閒嘗飲惠與否。爭進饋賀。其曰免織工。取直末入綾餘五百匹。至大之元冬十月二十有七日。不病而卒。年八十一。妣郡太夫人亦樊氏。金行部員外郎之女。常從母受學。故于經史及列女傳皆嘗誦習。且善書。歸解氏。賢淑有聞。舅姑姻戚稱其孝睦。亦以至大之元冬十一月三十日卒。二子節亨。筮仕爲工曹史。出爲濟南錄事參軍。杖其豪右。使酒公所者于市。由是惡少斂迹。再轉德州判官。大新廟學。以振風教。移獄疑囚。凡有司積歲不能正其罪者。皆檄讞之。合前爲錄事。聽審得情。使誣詆者不得脫死。無辜者賴以伸雪。無慮引連數百人。事有今太子少傅李謙德州學記。郡文學所紀。部使者之章可稽焉。擢光祿寺主事。集賢院都事。祕書監著作郎。今進而丞。秩躋三品。又降恤詔。推恩二代。下及墟墓。其于孝子慈孫。責已塞矣。搆謙提領濟寧益都屯田。以親年下無兼侍。辭不赴。三女。長適知和州萬宣。次適同知膠州姜陽。季適太常少卿王景元。男孫六。儼儀儼舍人。儀國學生。四未名。女孫六。長適般陽學正王麟。餘姆銘曰。

生短其名。隨死而泯。猶于柳車。曾未旅軫。一世鼎鼎。幸趨者多。思所致然。夫豈在他。由積無素。功微德薄。

譬彼潢潦。其盈易泄。惟義士君。詩禮青氈。術已惠人。矧財善捐。篤生孝子。家學弗泮。一爲集賢。兩踐東觀。用是宸楓。進官少中。推恩其先。俾貴與同。又爵之侯。士以渤海。于祖少隨。惟土未改。中順伯之。兩妣皆樊。太君夫人。賁及墓門。平生侯伯。精多利物。安知斯時。不已肉骨。矧茲祕丞。臚仕日躋。爾伯爾侯。進爵會齊。安定東原。萬家可置。戶以守之。用華百世。

磁州滄陽高氏墳道碑

有國之所以寵臣下者二。曰爵曰錫。爵自九品。推而上之。至一而極。雖有策制教授等威。其歸皆億萬維臣之同。若夫錫也。億萬臣中。無有百十之見及者。人臣得之一已幸矣。況于三乎。在易師象。以三錫命。爲懷萬邦。今江浙行省郎中高謙。昔都中書左司事。錫象笏。禮曹郎中。錫貂祛袖狐裘。中書左司員外置。錫白金百兩。金奇服三。實三錫矣。古所以懷萬邦者。集其一身。則天子之加禮。以使者何如。宜謙丐燧大書先桓。上以嘉君命之辱。下以起本父教之忠也。維高氏自汾之孝義。徙磁之滄陽。則由其曾祖府君有官勳于金。喪亂失之。祖府君諱閏。夫人張氏。考府君諱澤。字雲卿。金旣播汗。太祖徇地。北人能以州縣下者。卽以爲守令。僚屬聽自置。罪得專殺。磁守杜國用知府君吏能。求以自佐。推澤爲孔目官。俾司其州岸獄。招求散亡之民。大兵之餘。市虎田萊。驅而翦之。以立公宇。四境戶版。僅及千數。他州之民。聞磁懷輯。有譽多來居。他州虞損戶數。欲徙還之。不得。遣追胥。卽徵徭賦。壬子。天下大料民戶。歲入銀四兩。民已無所于得。州縣迫征不休。回鶻利之。爲券出母錢代輸。歲責倍償。不足。則易子爲母。不能十年。闔郡委積。數盈百。

萬令長逃債。多委印去。時開尙書省于燕。府君頻歲以二者爲控。曰。今天下一家。無有此疆爾界。民之錯居。宜從土斷。又百穀桑麻。衣食之源。歲鱗取之。爲利無窮。古有天下者。悉驅游惰之民。盡力南畝。今釋是而戶賦之銀。且產銀之所。四海無幾。必深山邃谷。鑿隧篝火。舂礦鼓冶而得焉。可以盡給四海賦民之求哉。若是不已。將日消月削。窮益滋甚。省雖是其說。竟以法制立矣。皆不得其要領而還。中統詔下。而負銀始革。州遷滏陽令。府君曰。孔目州佐也。他令由吾銓。今乃與是班乎。薄不欲爲。後朝廷誅東反虜。懲世官弊。守令之選。收歸吏曹。而易其地。前爲令者。悉以今遷。府君惟自州佐監武安。衛輝。單曹酒稅。衛輝。單曹加提領。或咎昔不爲令。府君則曰。命實使然。我自棄之。又將誰尤。天今畀予征商。不剝下媚上。道及民矣。安爲而不卑之。及謙入官。來前。飭曰。吾所以屑俯首者。待汝用世也。勛大吾宗。吾不仕矣。以至元甲申夏五二日卒。年六十一。葬某里。夫人劉氏。以賢淑聞。二子。長某。早世。謙始爲彰德路總管。府判官。入爲工部員外郎。轉都左司事。禮曹郎中。左司員外郎也。尹開州。兼諸軍敖拉。遷江浙行省郎中。改淮東宣慰副使。江西行省郎中。再爲浙江行省郎中。固亦足顯其親。況稽近古。父位不充。而子或通耀。國家不欲子孫貴。臨祖考。故視子孫。今何官勳。生封而死贈之。使貴與之夷。興孝勸忠。聖元旣法行之。加郡國公侯于某將相之家。亦他日求推恩之凡也。州佐比古上士。道可謂未盡行其時矣。而先有是仁民之策于廷臣。欲紓其急。其蘊豈淺淺哉。而天嗇是享于其生。其留豐報諸其死。俾哀榮及廟墓者。匪資謙貴也。從而銘曰。覆一黃以基崑崙之臺。旣由藁以須負棟之材。此常人之情。皆亦蹶蹶其艱哉。孰曰昌厥後來。爲濟時之

才弁冕崔嵬而非九德之階豈羈於人而天之諧歟必百世溢水限有由斯銘而伊人之懷者矣。

靈山先生董君實墳道碑

嘉議大夫臨江路總管兼管內勸農事董章將勒石甄表其考府君靈山之墓持太平郡文學姚和中事狀丐銘于燧因惟萬物本乎天人本乎祖稽漢金石惟祖始不可推采者則不本之苟可推采無泯泯而不本者故祝睦緒高辛火正祝融度尙與顓頊世掌位統國法度衡方唐扶之胄堯陳球袁良之苗舜孔耽殷烈蔡湛文葉諸君是後神明者可殫紀耶然是推采雖精博之士遠據爲說猶啓後人牽傳之惑若春秋傳蔡墨對魏獻子龍問曰颺叔安裔子實甚好龍能求其嗜欲飲食龍多歸之乃擾畜龍以服事帝舜錫姓曰董春秋外傳以蘇顧溫董爲己姓之族蓋黃帝二十五子姬酉祁已滕葢任荀僖侷嬭伊惟青陽與夷鼓同己姓則董父非止裔于颺叔安爲黃帝裔孫者又較著也在夏殷世文獻無徵周則晉良史狐安于秦將翳漢江都王相仲舒實生廣川其地則今真定屬郡冀之棗強故是姓在趙者多宗之或曰今居真定天祿坊者猶其遺苗君諱珪字君實曾祖明善祖好義考信家真定屬縣靈壽其雖析天祿固未大遠至君業儒以江都罷黜百家表章六經使道術有統爲羣儒首嘗著玉杯繁露發春秋微曰吾家學也遂專經春秋當授室鄉先生宗訥奇其願立女焉事考府君妣夫人色養無違有純孝譽味道自腴恬忽勢利不苟上交所親與者纔兩張公安撫芸大夫參鵬舉殊篤其敬使則過其廬遠遠則書候其安又善植產積則散周其鄉歲荒爲糜以全餓人加饋癯老以肉逮三子章奇彥奇生曰古以三人爲衆吾

家四世。惟一其傳。積德在余。有是乘子。延師私塾。務知修己治人之要。以篤其成才。不事記覽。爲詞章。誇逐時好。旣其入官。惟飭三事。曰忠以事上。清以約己。仁以裕民。古之人。未有舍是而名昭于時者。晚愛靈山。暇與親友縱遊。曰是荀卿子所謂秦刻趙有荅及松柏之塞者。後與封龍無極三公白石其一。則余忘之。爲六名山。皆吾郡之望。太常給珪幣祠其得法食者。今其文曠墜。吾與二三子屬觴乎。此亦可爲千古一慨者。故人號之靈山先生。以至元二十有三年丙戌春三月十有一日卒。年至六十九。其月十有六日。葬某地。以前卒宗夫人耐繼娶孫氏。章由卑官。積至太平路總管。邊總管平江。戶甲天下。賦重而役繁。民頑弗率。前政往往以不職罪去。及章來。爲出令化之。不專威虐。而政以成。績最浙西。爲良二千石。斯克佩先訓之效也。後移臨江。至未再月。以首疾去。奇太原路交鈔庫使。彥提領蘄州路稅課。二女。適百戶王某。鄉人趙某。自章而下。皆宗出。男孫五。汝霖。主岳之臨湘簿。汝榘。提舉大益山屯田。汝梅。同知信州路事。女孫五。一適燕山劉氏。男曾孫十二人。仲玉。仲珍。餘未名。元孫二人。嗚呼。後靈山者四世。已二十有四人。入官不家食者四之一。其遠而益蕃。盛光大清顯者。可知也已。銘曰。

維天子土。不全其畀。或隕窮家。或顯庸世。其顯庸世。無澤民加。雖烜其時。清議弗華。其隕窮家。肥遯自遂。道集其躬。令譽日致。嗟之有荅。伊爾廣川。江都之宗。實蔓以綿。其存遺編。玉杯繁露。千載茫茫。誰究其緒。君曰家學。吾舍焉師。孝親之餘。力振起之。天爵篤修。紛華若遺。迨子之仕。提耳三事。曰忠事上。清以自治。仁能裕民。則古良吏。章也持循。恪慎其身。官二千石。歷郡必聞。有後如斯。亦旣克述。其來其思。無替爾續。

神道碣

孫府君神道碣

少中大夫前同知荆湖北道宣慰使。今福建行省郎中孫顯。自福州使人持其考盧川事狀。六千里走書京師。謁銘神道于燧曰。我孫氏故鄭管城力田人也。族大且滋。由兵興去平土。卽險而居。始遷今河南之登封。會歲荒。先人分族五百指。輦祖妣就饒唐之比陽。先祖獨留祖妣卒。其族以干戈未靖。謀趨漢南。先人死懷先塋。生思先祖。偕先妣挺身西北。至則鄉邑蕭條。先祖已無可問其存歿矣。寓食河之北。數年復歸翦棘而田。斬茅而堂。日夜作苦。十年而能家也。復崎嶇唐鄭之郊。卽遺親故老。哀號百至。以求先祖之柩。竟負窆盧川。篤孝如是。人有亡罪來歸。寧抵冒法禁。舍匿其家。不忍聞知官也。事去則衣裋而遣之。後有子明顯。益躬力穡。不勞使之。以奪從師。知學爲吏。晚歲號盧川老人。與紫雲雲崑玉溪輩。年相夷者七人。相從泉石間。方顯通貴。力可以足旨甘。適清溫而嚴霜交墜。嗚呼命耶。孤顯逼以福省。始罷今開。傳持其印。甫畢襄事。不得終喪而南。固不爲昊天者弔矣。重念先人爲太平不遇之民。行施于家。而不昭一時。言及其鄉。而不聞百里之外。功微而用薄。道晦而居易。所以亟勒石者。非以溢美誣世。是求庶幾吾宗遺苗。知權輿斯家之易。雖明詔嘗有追封之文。猶以例未開。不敢倡爲之請。以試不測之雷霆。今幸賜銘。非顯生拜公嘉。我先人亦將肉骨于九原也。敢泣血請。燧哀其志。且生永寧。去登封三百里。均爲河南屬縣。

爲生同鄉。少中宣慰荆湖。某爲憲副。爲同官。義不可讓。嘗究孫氏先世。由喪亂。名字皆逸。少中之祖。伯季四人。其伯也。始徙登封者。實生盧川君諱聚。字某。年八十五。以至元丙戌冬十月十日卒。葬先塋。以元配程氏祔。程有賢行。以君四十無子。爲娶姨母尹氏子。而生明顯。明讀書不仕。男孫七人。禎將仕郎峽州路知事。復將仕郎主枝江簿。亨謙。豫節元成幼女孫一人。亦幼。男曾孫六人。未名。女曾孫四人。逾幼。嗚呼。君夫婦惇然。還登封。及其屬纊。三世子孫已且二十人。其婚媾葛藟之家。猶不居是選。固已衍爲盛門。已微而昌。始屯而亨。天之福人。亦易矣哉。又少中涖民治軍。遠跡嶺海。蜚聲振績。爲時聞臣。子貴。應銘法。銘曰。凡今受姓。咸出黃軒。其自以氏。實爲公孫。後有王孫。別胄王室。文由便省。去覆而隻。有煜兩孫。世緒咸遙。欲一其初。循本自條。其居登封。由管城徙。鋒鏑逃歸。子然一己。胼胝手足。克艱造家。感迷先邱。號求爾遐。民欲天從。爰昭其孝。指所在藏。假人以造。乃安斯窆。廬店之阡。爲子擇師。斲材毓賢。日薄西山。釋勤自佚。鬪蘭釀松。踐嵩故實。伊誰首之。內翰馮公。君誠未學。異世樂同。杖履聯翩。榼壺攜載。偃偃耆耆。白首七輩。富田連疇。壽垂九齡。子孫官歸。朱紫拜庭。君可盡有人所願愛。黃腸一棺。無恨于蓋。送終隆數。孝子義爲。嵩高如拳。始爛之碑。

奉訓大夫知龍陽州孝子梁公神道碣

維梁氏世彰德安陽人。金進士棟。生皇府錄事生圭。忠濟爲東平嚴侯。力能生殺人。彰德時爲屬城。招不能致。足白自信。不可威屈。生君諱琮。字文玉。修幹美鬚。好學篤古。考府君卒。廬于墓側。晨夕悲號。不異祖。

括手理垣木鄉鄰傷之衆佐其力終喪初事北安王再辟掾宥密後從濟江以平宋勞官承務郎尹湖之長與民俗生女則教琴筑歌舞長利技色事人取貨歲滿則質他室生男謂無所于得率不鞠投棄諸水爲檄曉曰若新國也未知吾元爲律倚市門子猶不敢棄況茲天民長賴給上力役者不特傷汝父子之親亦乖聖世繁育生齒之旨敢復然者論以違制由讀木蘭院碑載宋寶應丁亥湖水大溢流死數萬聚葬於此若京觀然遂蠱傷心罪前爲令罹是大厄猶不爲虞安必異時湖水不再至耶發民築防延數十里高袤及丈日急其程如水朝夕至者悅以使之民不怨勞竟工種柳雜木其上以捍衝齧縣有李王祠百區皆非法食毀取瓦木用新縣治廟學尤麗高敞加什其舊卽其羨材倉廩府庫病坊遞舍無不改爲居民行旅爲之改觀效命義軍故皆鹽夫羣行市中人無誰何一日椎釀甕眇酒翁目叱衙兵追捕或諫如是驟繩恐不利尹君曰吾奉天子命尹此土茲此民安能坐視鼠子與尹爭長雄自爲名哉盡收其黨二十餘輩杖之鄰死自爾鄉民效尤夙號難令小裂公牒大殺兵吏者皆側足斂手無敢肆暴嘗裹糧紱印行田老父爲具食發囊償直父問所紱爲何曰吾令也紱縣印耳父出告其鄉鄉民百數十人追及子行爭持酒炙遮留後至者觸器覆酒流地酒主憤云令去必刃汝觸者曰吾亦有刃報之君曰民以吾故相仇其咎在令衆惶駭罪其失言二人慚伏君爲曉曰吾元禁挾弓矢刀槊嚴甚輕杖重死若曹何苦干禁挾此爲耶且戍兵以索此爲名得之則破汝產其皆納置令所乃得兵數千事而還後衙兵暮夜追呼民燭令署晝刻而至訟牒至前決以其日未嘗滯囚圓土屢空去之日士民號送填道擁馬旣久猶思求

頌其德。刻石縣門。後令不可。民請不置者數年。一監縣者曰。梁令非有惠民。何能致然。從汝樹石公堂右方。書今歲陽歲名。以彰其賢。且俾人灼吾不昧善也。至元二十四年丁亥。去寶應實一甲子。湖大溢。水不冒防。纜二尺。民始歎曰。微梁令。葬魚腹矣。雖求爲魚得乎。加承直福建勸農營田副使。巡行建寧時。羣盜聚浦城。戍將方加兵。君止之。請身至其棚。曉曰。汝皆平民。逃州縣重賦繁役。出此甚不得已之策。汝曹自計。甲兵堅利。儲餽有繼。訓練有素。徵發日多。孰與官軍。而乃以就盡獸聚鳥散之人。抗之不敵明矣。能從吾言。捨險卽夷。相率而歸。小可以徼賞。大可以得官。孰與鬪官軍。身膏草野。妻子奴人。平。因血指爲盟。民感泣。投戈拜賜。不煩兵而附順者。若干千人。後議事福建省。會南劍俘賊妻孥三百餘人。至。公曰。是多平民。爲賊驅脅。宜旌別之。縱歸者半。尋遷福建都轉運副使。丁妣夫人憂。又廬墓終喪。升奉訓大夫。知常德。龍陽州。民間有惠長興。爭境逆而遲其來。方大施張。以變前習。數月代至。民復境送而速其去。大德四年。爲子鎮。畢婚南劍。夏六月十一日卒。歸葬其鄉先塋。夫人同郡李氏。二子。伯也。鉅。有學行。二女。已從同郡趙某。許昌程某。二孫。浩浦。至大己酉。有司上羣從共居族子。亦能喪親如君。詩曰。教誨爾子。式穀似之。宜特旌異。風勵四方。庭臣用嘉。揭諸大達。爲孝義坊。過者式焉。鎮恐先德猶未白世。開燈舟應宮賓之招。自淮安逆。至。僂真。拜而請曰。先君墓碑。未敢遽言。俟他日。必卽京師見懇。今而果來。爲之詩曰。

聞古有訓。孝子之至。不于養生。于喪自致。敦古如君。未忍其親。元宅長遠。曠野無鄰。卽邱築室。僅蔽兩日。呱呱三年。忘盟與櫛。家本之身。克爾親親。推以爲國。何有仁民。長與孩乳。脫不冤夭。患防悍馴。庶弊皆矯。

于福營田。劭農是官。往造賊巢。舌柔暴殘。雖生平爲蓋棺。迺定不有。太史執筆。卓行瀾瀾。清漳源出。大行有碣。其播流芳與長。

武略將軍知秦州史君神道碣

至元十有六年。其歲己卯五月二十有一日。武略將軍知秦州史君。卒後二十二年。夫人亦卒。又後是十有一年。至大辛亥。其子興平令誠。三千里馳書京師于燧曰。昔太傅魏國文正許公。私淑于秦。我先人時童子。北面事之。君年先立于下風。今將舉是二喪。別塋于長勝坊少陵原樹碣墳道。昭示悠長。銘捨先友。其將誰託。余勤其請之遠。爲序曰。維史氏雲中人。太祖加兵中國。禡牙始此。故考府君廣。隸師王穆呼哩戲下。以從殘河朔河東功。戍鎮西州。金蹙國播汗。棄關輔。徙其民于河之南。乃偕田侯雄。踰西河。雄取京兆。府君逐盜。華州芟荆杞。飯蓬稗。以立官舍。又歲。從太師塔爾海伐蜀功。授璽書金符。卽知華州。有子八人。君其嫡長。諱克恭。字子敬者。皆先師所命。年十有八。府君丐老。遂襲爲州。惟騎射精妙。得其家學。他皆夏去。執綉豪習。遇其聯仕。不以刺州自多。而克下之。華之父老故人咸語曰。吾邦君有子能爾。其所加禮。不以年少而後其父。會罷世侯。遷刺同州。同接壤。華人信已素。滿秩刺乾土。廣而戶寡。不虛旬浹。以嘗甘涼。諸侯王妃主吐蕃。去來驛塗。比供億不失。幸未速戾。實艱實棘。勵志州校。割俸爲倡。倉新廟學。後刺葭州。葭瀕西河。方攝延安路事。咎順寇成都。盡發路民爲兵以戍。君汰貧弱。惟抽富民產沃丁衆者籍之。輿誦曰。平。俄秦藩肇建。方冬。發萬人築白海行邸。君營五原寨。沍寒甚于他州。方是之時。急其程作。民必稿。

死。君輟徵集。須春赴功。其不苟民媚事。形勢如此。移刺秦州。未上而卒。繼三十有五。嗚呼。不年哉。大帝淵龍白輝驛。致先師至秦。實歲甲寅。君從學八寒暑。先師嘗譽其厚重篤勤。有入道資。由己未還鄉河內。故不卒業。而早宦所就。已此。夫人瓜爾佳氏。金遼東行省必喇珠之孫。皇先鋒使色埒之女。當君之卒。年猶盛也。三子誠弟謙。以門功主同官簿。讓不祿。觀二子成立。若是。豈不爲善持家學之徵歟。女孫三姆。銘曰。繫君先公。與龍之逢。拔民于雲。樹勳先攻。初亦豈易。奮戈顏行。攻壘略地。大河之陽。由晉而西。移軍宏農。乃翦寇攘。有華四封。何以寵嘉。有煒金節。副之命書。郡侯是列。君襲爲州。猶小子侯。會華世官。循年轉流。遷之馮翊。與華壤錯。吏習民安。坐嘯畫諾。于乾于葭。乾難葭尤。乾止倏還。葭多隱憂。隱憂如何。籍兵戍蜀。與彼秦藩。行邸迫築。乃恤民寒。緩程須春。年不三紀。未上卒秦。司月旦者。評有二悼。一不終業。魏國去蚤。一官止西。雖曰邇家有施。不幸神都去遐。不峻其階。終始州刺。豈天嗇之。將熾爾嗣。少陵之原。實古上林。碣以表阡。庸告來今。

太倉監趙君神道碣

燧讀廣平府教張宏。狀其弟子。今奉議大夫。僉嶺北湖南道肅政廉訪司事趙勵之考。太倉監君之行。而取其三焉。曰學約而醇。官久而卑。操窮而確。蓋書以乘治。忽詩以正性情。易以際人天。而春秋以謹名分。著懲勸。其刪定繫作。雖一出仲尼之手。以諸賢弟之問。聖師之對。示萬世以操存涵養。爲傳心之要典者。惟論語爲然。而君誦之終身。不治他經。雖不治他經。以推治他經。譬則破竹。將無有迎刃而不解其節者。

豈若今務博者。童子知誦六經。白首猶迷其源。委君亦漢氏諸儒專門一經。顧多成才之亞。歟。故出而仕。其卑則監倉。夫積久而易穰腐者。惟粟。必贏其入。而倍其出。贏其入也。則輸粟之家病。倍其出也。則受廩之家伎之。或一有言。皆觸禁者。矧利所在。覬得者衆。臨制之吏。鉤名綜實。不于書。則于庾。鱗比取之。月異而歲新焉。幸有慎者。已不爲盜。人則迫使必盜。故完往而敗歸。潔入而汙出。償產傭孥者。武敏接也。此監府縣倉者然也。太倉則儲幅幘之粟于斯。其穰腐尤夥。尤夥則贏入而倍出者。愈無紀極。地由邇輦。穀則病而伎者易愬。易愬則完往而敗歸。潔入而汙出。愈速。或一二歲爲之。不償。傭孥者有之。必無二十年之久。而不蹈者。非不循俗。嚴己以拒人。察察醇白者。疇克爾然。亦确确乎其艱哉。或疑是非德之大。不曰鄭之國。渠鑿涇。注填闕者水也。井亦水也。以之溉也。井之利。累日夜有不能終畝。而鄭渠歲灌。澗鹵四萬餘頃。夫不計井之勞。與所居之小之異。而責其不爲鄭渠。世鮮不以爲迂。使日夜汲之。積二十年之久。冽而不竭。亦佳井哉。監倉古委吏比也。仲尼之聖。猶止于當會計。讀論語而學仲尼者。能是已矣。非德歟。既其歸也。有廬于城。而無田于野。無臧。獲以服事朝夕。供井白之勞。薪糧之須。諸子身之衣。惡食菲。安不怨尤。里之豪悍。有恥其乏者。曰。使幸交我。我則周之。君曰。吾受德鄙暴。以捐吾介。不可及子。勵仕常從之。官每飭之曰。世固有羞賤貧。而希富貴權倖。以死無回者矣。莫不一敗瓦裂。汝惟義命之安。祿入之外。不可他營。銖髮以賊其心。能謹其事。而忠于土。則良子也。年七十九卒。猶以是爲願言。實至元甲申四月十有一日也。君諱珪。字君璋。世居盧龍。范陽閒。四世祖通。以材武得官于遼。爲千夫長。祖達。不仕。考託。監酒上。

蔡義宗播蔡死蔡亂君踰河僑家洺州爲州將成侯兵曹後入監太倉洺今易爲廣平陞州爲府元配河南胡氏前卒三十二年三子彧德安勵金無經學吾元狗地漢上得江漢先生趙復于雲夢至燕而經生始集彧從之遊有善學譽與耆宿友年二十四德安年四十皆前卒一女適肥鄉蓋氏再配東海盧氏前卒二十年男孫某年二十五而卒女孫一適同郡韓氏一適巴圖總管子毛穎孫曾孫一人未名勵自知淮東憲事入掾中臺又掾中書出同知晉州雲南行御史臺都事今爲湖南至所治善恪其先訓者大德戊戌將改葬君與兩夫人于某鄉里求隧銘墓碣銘曰

生煒有輝歿淹其升孰曰嗣人克善秉承幽光于生蓋棺益耀非子式顯歸以何道嗟太倉君恬養廉貧其志不越式是後人入循周行出而嬰荒繡衣所如梟狐遁藏期爲良子可曰不負令甲聽爲于親可後易桓爲碣洺水之阡太史繫詩何永不傳

牧庵集卷二十六

先德碑

開府儀同三司太尉太保太子太師中書右丞相史公先德碑

至大之元秋七月二十有八日。制曰。丞相慶公之先。及事列聖。繼世忠謹者。既敕有司。既諡既封。非刻金石。終恐不能垂示悠久。其令翰林學士承旨臣燧。爲撰次之。臣聞命兢惕。誠以不文。不能鋪張大君子盛烈。上負明詔。其冬。而其家乘始至自夏。故得反復究觀。公夏人。史姓。曾祖考持。持理威。夏臣。贈同德濟難功臣。諡康穆。祖考拉吉爾威。宿衛太祖。贈服勤翊衛功臣。諡敬簡。考算智爾威。關弓馳馬。拳勇絕人。入侍世祖。潛藩歲癸丑。從平雲南諸國。以驍果聞。及歸行賞。賜馬五匹。鈔二千五百兩。價與銀埒。己未。又從濟江攻鄂。戰疾力。明年。帝正天位。從征叛王漠北。小大之戰十五。賜白金幣錦。以爲蒙古唐古軍民達爾噶齊。年七十八。終。贈推誠翊運功臣。諡忠宣。三世皆太師儀同三司上柱國。公祖考加開府。曾祖妣伊拉齊氏。祖妣蔡氏。妣烏納氏。夏王外孫。皆從封夏國夫人。七子同出五人。公次居二。以奇塔特布濟克名行。自童幼。從忠宣出入世祖帷幄。天監灼其已克。恭勤。至元丙寅。選侍裕宗于東宮。將二十年。敬畏益加。無少僭忒。逮順考生。皇上儲皇。詔公保育鞠視之。每帝召見。則必左右兼抱之。至前方幼而學。詔教之。經以其嫡子額爾吉納侍讀。俟其遨嬉廢誦。輒撻其子以警之。故能終業。大會將畢。聚諸侯王讀太祖大訓。加丁

寧告戒之。始遣就國。或皇上儲皇不在列。必邀致之。使與有聞。出申飭曰。是汝他日所宜爲者。其謹識之。必舉其辭。無庸怠忘。徽仁裕聖皇后。以善于薰陶翊贊也。責其四衛番直諸臣。事皆咨聞。大德二年。成宗詔皇上撫軍漠北曰。是昔大帝授朕者。今以付汝。且以輔導扈從。壹是軍務。悉聽于公。宿衛諸將。皆父事之。至則訓練六軍。總裁法令。胥地所宜。可屯田者。必分耕之。以佐軍實。屠羊不湯其毛。而皮之。與餽餽棄餘諸物。皆集以市諸部。易皮爲裘。禦戰士冬。四年。以文移無印。難杜罔欺。又身入聞。得裕宗信寶以歸。明年八月。寇大至。公教吾軍表紅衣于甲。以自別。俾闕不迷。大崩其羣。自是寇望紅衣軍。則退不戰。九年。皇上踰金山。公視軍士失馬徒者。空其羣散之。死則不責其償。十一年。成宗賓天。使至。皇上欲棄大軍。入主居憂。公曰。是使之來。惟以告哀。且彼事宜。難以遙度。須召赴使。皇太后儲皇。隨以削平內難。見告。且促其來。即日假公平章政事。驛至大都。輦致金帛于北。爲朝集備。五月。皇上立極。眞授榮祿大夫。中書平章政事。蓋公雖歷事世祖。裕順成三宗。其貴有位。則始乎今。踰月。儲皇入陳疇。昔調護之勞。制亦曰。非夫人之力。安及此。加銀青。封慶國公。妻庫庫楞同封慶國夫人。七月。進儀同三司。太子太保。九月。加開府。太子太傅。明年。至大之元。二月。拜中書左丞相。復以爲太子太保。加上柱國。四月。拜太保。六月。進太子太傅。再進太子太師。七月。加錄軍國重事。十一月。中書右丞相。十九。易朔之閒。凡九降制。人臣之位。至是極焉。又以其兄阿拉克布濟克弟昂齊。皆榮祿大夫。司徒。兄兼都元帥。弟遙授平章政事。弟日爾塞。榮祿大夫。使宣政院。寧夏甘肅。釋都總統託羅岱管軍千戶。蚤卒。他母亦烏納氏。二子烏尼爾威。珠特爾威。男孫十有七。

人達實和爾布管軍萬戶虎符倫圖爾威塔海諾海都迪爾威伊齊特穆爾額爾吉納年二十二至漠北之明年寇出金山南庫布哩額爾吉納將左衛射士居顏行當寇驍將既接戰刀槩兩不能施手搏墮馬斬其首明日皇上解御衣所乘馬鞍勒爲賜仍偶一良家女寇夜襲他部輜重以遁又將數百騎追敗而止還之四年又殄寇于昂吉爾圖獲人畜財貨不可口匹貲算又明年寇舉國至又戰于哈喇台以數十騎出入其陳數四所當披靡莫之與敵寇大駭卻皇上乘之遂大潰斬馘不可級計十年躡金山前茅獲俘萬餘人斯皆効死于乘輿前天日昭覩者明年寇平第諸將功膽略材武推爲冠軍立極之日授資德大夫同知樞密院事六月賜虎符使太府院事唐古親軍都指揮使七月加特進遙授中書左丞相又進知樞密院事又兼使典瑞院至大之元五月兼使仁虞院十一月拜御史大夫哩日初事晉王有謹敏稱皇上至軍之明年大戰庫布哩雖勝而寇退未遠與晉軍合而大官廩肉不足則日餽二羊又繼諸軍糧其府又盡則賦他部供億後多其忠從晉王求致左右立極再月授資善大夫翰林學士承旨十月進榮祿大夫遙授平章政事行大宗正府伊克扎爾固齊十二月授卿典牧至大之元二月使尙服五月拜光祿大夫遙授中書左丞相七月兼使將作院爾祿幼爲沙門十一年至軍中賜御服帽帶俾不祝髮其年官以正議大夫僉宣政院事女孫十八人有從者十曰戩伊特楚曰按巴曰哈達遜曰幹幹曰聶辰曰世兼千戶曰聶爾布曰吉連布曰染齊曰善布男曾孫六人額爾吉納威玖哲爾威布都爾威宿衛乘輿卓爾齊阿嚕輝徹爾濟勒爾威女曾孫二人臣嘗槩公父子有四德焉一則曰保育聖躬再則曰舊學三則

曰周旋軍中。十易寒暑。修扞于艱。終則曰扶植皇極。宏濟登茲。高明一門之間。三爲丞相。無盛與儔。人奚間然。敢再拜稽首而銘之曰。

維史胄出。書焉有質。伊誰云從。則周史佚。踰二千載。餘慶茂蕃。推而上之。實一其原。嗟公之家。中土亦始。其來姑臧。不知其紀。可系而名。則由其曾。奕奕其繩。陞陞其登。祖衛聖武。左右興祚。龍咆虎號。風雲胥附。考事世皇。荷袂與戈。防于南詔。爨焚墨摩。再從濟江。攻鄂東北。舞于梯衝。執訊雲壁。又偕度漠。冰雪義衰。手按足躡。拳勇維何。固叛是求。凡十五戰。不搖疾颺。勁草乃見。歸以壽終。生子如公。帝灼其心。惟一効忠。式昭德音。選臣裕廟。其盡其戰。其德其要。洞洞其信。屬屬其恭。介介其守。廓廓其容。皇上儲皇。旣生順考。詔輔翼之。俾躬是保。及情授經。撻子示懲。止其邀嬉。大訓服膺。其彌爲善。若是非一。臣鄰德將。疇與爲匹。成廟降制。俾從撫軍。朔方十年。日伺寇氛。畫橫雕戈。夜衽龍盾。惟彼不至。至戰必遁。未踰金山。危巢是傾。竟令飛揚。不追大刑。惟皇作極。言念大德。旣贈祖考。公以夏國。美諡崇階。罔一或遺。父子丞相。百辟用師。尙服其衣。尙乘其馬。門戶輝光。世無二者。爰詔史臣。樂石特書。賀蘭可磨。而銘始渝。

先德碣

河內李氏先德碣

至大庚戌。鄒王府長史兼經歷典食司。與所部人匠都府官李惟恭。持其鄉士席雲漢狀其祖潤文玉。使

慘之利用庫日。民調商征之入。吏祿公須之出。不遺于受。不僭于發。如他人侵蠹以益其家。負而償。償罪沒產者。皆無之。與人交以誠。御下以寬。禮賢樂善者。求表其阡。燧曰。管庫之官。則古委吏。亦下士也。所可筆者。豈專由孫貴耶。蓋鄆王之考。初尙主世祖。再尙主裕宗。自稱晉王。克用裔孫。爲置守家數十戶于雁門。禁民樵牧。由分地在高唐。卽是進爵爲王。世居靜安黑水之陽。爲廟以祠孔子。元貞始年。表賀聖節。獨書漢字。庶其尊禮斯文者。惟恭。今臣其子。觀其所事者賢。若不可辭。矧有大此者。懷之爲州。憲宗大封同姓。初國世祖干秦。以戶寡。益封之。至元之末。以封其孫順宗。旣之國。未至。疾返。賜名懷寧。以王。今聖時方撫軍于北。皇太后儲皇往居者二年。則懷爲三聖龍潛之地。傳曰。小國之君。當大國之卿。爲下士是邦者。當宜何哉。則君善職管庫者。有不必言矣。卒以大德乙巳三月十有八日。年六十七。垂絕。猶念惟恭不置。曰。吾平昔鍾愛是孫。今遠宦數千里。不及聞吾願言。可憾也哉。妣王。後二年亦卒。二子從鼎。從信。孫則惟恭其長。初由王府郎中羅忠國使懷。聞其好學。愨有立志。遂與偕北。卽壻其家。進之于王。王甚禮之。言無不從。事必見咨。妻卒。賜楮緡二千五百。爲取元氏子。季惟寅。銘曰。

苟卿子言臂非長。升高而招所見彰。斯若可用爲君方。惟懷爲州河之陽。實爲三聖淵龍鄉。其閒下士雖守藏。或小大國君卿當。其貴可參攀鱗翔。況復有孫翼賢王。遠塞而近孔子堂。仕優學以能自彊。何畏潛德無輝光。

墓碣

朝列大夫飛騎尉清河郡伯張君先墓碣

章邱爲濟南屬邑。士子張養浩。年少而志厲。績學而善文。舜知平章魯國康利公曰。汝學仕耶。今之仕者。莫不由吏發軔。遂用爲儀曹史。超掾中書。滿其年考。出令堂邑。一守敕約。便行弊祛。形勢不撓。惇鰥不侮。民惠之懷。咸稱曰。自停年之制行。令吾縣者。前十餘輩。無右吾令。求紀于石。走未遑爲。今聖淵龍。召爲宮師。府文學。進司經宮府。隨拜監察御史。轉翰林待制。今都中書右司事。由武宗詔內外臣五品而上。列五爵。三土階勳而等威之。封生贈死其先。五品則縣子。男從而正子。與四品郡伯。皆止父一世。三品二品皆郡。三侯二公。上及其祖再世。一品國公。逮其曾三世矣。故官父郁朝列大夫勳飛騎尉爵。土清河郡伯。養浩思異斯寵。碣諸墳道。且自爲狀受姓之遠。與家章邱世數可知者。則自其高曾。然猶兩世皆逸其諱。惟知曾常官武略將軍。監陽邱之燕鎮酒。其致斯者。任子耶。入粟耶。武功耶。皆見無所。武略四子。伯不年。而仲不復。叔萬季山。叔娶郭氏六十澤。職管庫于蜀彬德。正德林秀敏孫。十有五思敬。思忠。四川行省宣使。思誠居郵耐。馮獮崇興。特授裳履繼。季娶苗氏。二子。一失兵間。次朝列。則今清河郡君。生子英塞。皆天顯。今者惟養浩祖及諸父振粟其鄉。禦盜于家。脫人以刃。緹井取飲。活友于死者。有家乘詳。惟夫不大振顯。數世而發。是一旦者可不爲明之。且人持衡。猶必稱物而使之平。矧天所司。惟一福善而禍淫。視其力行。

非度盛而著者。故有不終歲。阨爲衰微。而安行所遇。必數世而始進于盛著。譬之鉅室。徹則一日可爲平土。構且累歲。不能以落其成。古人監此。所以垂從惡如崩。從善如登之戒也。夫如是。則章邱之蘊美含章。雖武略之僅官。樞酷而猶不能頡頏時榮。其上之晦迹。又不知其爲世幾何。亦庶安行所遇者。蒙莊有言。今夫水。其積也不厚。則其負大舟也無力。朝列之先。厚水者也。資其後以負大舟也。佐五命。而所生享報如是。未艾其年。子之位日高。而所生又隨之。而加非若陳省華與三堯共躋台。衰者不止也。雖然。是猶以子貴推言。使當其時。朝列責其子爲農爲技。則亦不儒而已矣。又何自開廣聰明。漸涵道德。工其語言。流其聲譽。居茲清列哉。然朝列又爲子擇術之精者。銘曰。

嗟今士子。人孰不期。煜其華辭。震耀一時。惟其才資。得天者薄。雖竭爾力。而竟落莫。矧古有作。如車司南。能不背馳。千百兩三。孰興靈奇。章邱君子。名疇與昭。魯國振起。引以試吏。拔其俗常。令諸近畿。佳政用張。文學司經。寄帝耳目。轉而待制。典國筭牘。進而顯矣。推恩所生。勳伯土之。清河郡城。人曰子學。其父所詔。有赫今隆。則爲子報。子明能然。由居止仁。維以勸忠。示禮使臣。圭首方趺。碣其墓隧。孫熾仍昌。其來無止。

河南道勸農副使白公墓碣

彥隆始由太原。徒行至河內。致其父書魯齋先生。願遊其門。未有介也。乃因吾友翰林侍讀高凝。得操几杖。圭凝家二年。而歸侍其親。而先生亦召北矣。尋由避宅左揆。以集賢館大學士祭酒國學教貴胄。乃奏召舊弟子散居四方者。以故王梓自汴。韓思永蘇郁自大名。耶律有尙自東平。孫安與凝燧燉自河內。劉

季偉呂端善劉安中自秦獨公自太原十二人者皆驛致館下三年吾儕或病告官去而先生亦浩乎其歸乃奏有尙與公從仕郎國子助教昔者貴冑友也一旦能橫經下心事之爲師屬非其道聳是曹不可得其馴然北而俄侍裕廟東宮公爲講鄭伯克段于鄆已講而出裕廟語人曰是非空言意固有在也以國史院編修從仕郎仍助教擢奉訓大夫監察御史發阿哈瑪特賊國諸不法彼願誣公糾摘非實捕送刑部獄引隣婦有色者教誣公嘗竊往來而鄰婦力明其無有鞠之墮孕而事始白又糾膺帥西京宣慰使道拉實以已憾殺其幕僚凡是皆庸懦縮首危者而峻風節者咸偉之出僉陝西漢中道提刑按察司事燧亦爲其道副故得詳西上所爲其按歷皆分險僻荒寒諸州南而褒鳳金洋北而綏麟葭丹塗經龍門西河絕崖高可去水百尺止通一騎必遣導者先之有來騎使駐之寬所卒至則兩不可班視燒棧猶車衢也如是之地皆周焉制度卒有反者不卽覺捕惟罪社長監郡與憲司麟州人告陰濟民乘馬疾馳其讖仇也問曰所懷何書濟民給以反書仇上變延安延安移文吾憲公又請往治之所牽連二百許人繼燭治之再旬是州小僻無紙至覆舊案以書適近侍臣括馬其州館鄰牆也聞獄吏呵問終曉得公姓名歎曰世有克勉其職如斯人者使人勞苦之曰吾見陛下當首聞公竟白濟民無他特杖其給仇非宜言者公位憲諸君下會王相府拜布哈右承勳臣子開省京兆特異禮公其按問諸司皆拱聽者改僉河南河北提刑按察司事臺檄檢覈中興鈔庫中興故李夏都隸隴右河西道憲令竟事始聽東任公又走沙莽往復近萬里半歲而歸與其副使程思廉發數縣民完堤以捍河水罷當暑賦民牛車轉粟入淇又

改僉燕南河北道提刑按察司事。趣裝其考已疾。行至衛而卒。公與兄楹。卽藏衛西輝之蘇門周卜村南原。而其妣亦疾。乃朝夕哀死事。生卽教授于輝。明年燧召直翰林。感其毀瘁。骨見衣表。弔哭之餘。其徒數十人。拜庭進退。朋讓賓敬之道。囂囂然先生成法也。爲歎曰。嗚呼。燧亦先生弟子者。何嘗有一善及人如是。明年燧疾滿。告歸鄧。而故司農卿侯爵託語彥隆。或河北農副制下。必墨縵以出世議隘薄。自便非時。燧備車過衛。不可留。不得身見。爲書語其然。聞方督課有績。其妣亦卒。附其考墓。竟以是謝所事。以至元己丑秋八月三日。年四十六。卒。苦廬嗚呼。學可以範世。行可以礪俗。而已是哉。夫人賈也。以燧平昔善公。錄河南北道勤農副使苟宗道理辭。求銘神道。每一讀之一。投淚擲筆數年。終不能敍其事。去冬。以史事又召入翰林。過輝。夫人祈世母夫人爲言。持幣泣請。且使其子安禮與遊其門者。庭拜燧還其幣曰。吾無答吾亡友者。以是佐刻石須。嗚呼。非公仁義行家。能使婦人如是切切。惟恐沒其夫子一善。可曰賢已。公諱棟。考天祿。雖官而不顯。居頤樂堂。號頤樂先生。唐白居易家狀云。白姓家太原者。楚熊君孫勝白公。見殺于楚。其子奔秦。孫乙丙與裔孫起。爲秦將。封武安君。賜死杜郵。始皇思其功。封其子仲。公豈其苗裔耶。銘曰。

聞古五十年不稱天。公是不盈。天道未曉。學不篤耶。得譽先師。道不行耶。裕廟嘗知。職不舉耶。三憲著效。力不本耶。耕播之教。況冠獬角。敢言人難。彈射柄臣。聽者毛寒。猶枚其外。未及其內。視親于喪。觀婦于介。靡一匪善。靡一可涼。非我友私。月旦章章。嗚呼白公。耳孫猶令。其貫古松。歲遠滋勁。士不盛位。而盛吾賢。

盛位者衰。盛賢日延。有方其趺。有剡其首。礪石阡隅。千祀無朽。

國子司業滕君墓碣

觀漢諸碑。凡門生爲師作者。其文多稱在三之義。蓋本樂恭子民生于三。父生師教君養。惟其所在爲言。又列郡邑姓名字官。人出幾何錢于碑陰。多至百人。或倍之。令人每與今無古者。篤于其師之慨。至大己酉。燧長翰林之明年。國史院編修官東平蔡文淵。狀其師國子司業滕君之行。與門生許質。求表其阡。以君之再入成均。橫經丈席者。嘗數百人。礪石所資。一不借人出。二子獨加異乎古。豈不于在三。足拔浮俗。斯時耶。君諱安上。字仲禮。其先自洛徙中山。不可推采其世。考府君某。隱德委吏。斗食自捐。生君八年而不祿。妣李夫人。撫君誨曰。而性質開朗。記識兼人。且金名士趙燦。離孫。不可以貧廢學。感聖善言。師西巖君。克自砥礪。勤心聖學。暨其長也。尊聞行知。如不足日。私居自持。衣冠齊遼。及出接物。一誠以和。郡無少長。相謂不字。咸稱先生。學積其躬。道行其家。化及其鄉。府臣歸高。薦名于朝。敕教中山。是府多士。求親輝光。譬欬欲聞。鼎鼎其來。服縫掖者。將半齊魯。庭臣善其職。士有聞。用以職民。主禹城簿。壓于爲監。爲令與丞。刑或過中。必揆以義。馴馴上說。不使黥涅。妄加疑盜。廢棄永世。仁譽旣章。宣司所臨。若縣與州。事有未竟。必檄往治。裁中情法。守令憚之。出將入迎。若事大吏。徵爲國子博士。以其平昔自律。有先蚤作。晏修。誨誘諄諄。發蒙疏疑。立儒克剛。各因其才。矯拂于善。黨坐羣行。齒而序之。其極弗率。有黜與扑。成均作則。井然有條。卽升監丞。再丞太常。世祖賓天。成宗繼序。圓邱請諡。太室升祔。凡厥禮文。酌古損今。皆所訂稽。元

貞之元。拜監察御史。京師地震。上疏曰。君失其道。譎見于天。其咎在內庭。竊于外政。小人顯廁君子。名實混淆。刑賞僭差。陽爲陰乘。致靜者動。宜兢兢祇畏。側身修行。反昔所爲。以盡弭之道。其說累數千百言。反覆深切。有司不敢以聞。君則曰。吾不得干言者。遂委印去。反關其家。著書自怡。尋起爲國子司業。時已疾矣。願言其子。治喪無用二氏。以其年乙未夏六月二十有五日卒。年五十四。葬府城東南崔邱里。爲文一本。理義辭旨暢達。不爲險譎。非有裨世教者不言。有東菴類稿十五卷。故江西廉訪使趙秉政板之行世矣。又有易解洗心管見藏之家。亦多乎哉。其不年者。世同哀之。而文淵猶以不侍經筵。職絲綸。謀廟堂爲憾。嗚呼。夫旣師成均。官奉常。歷臺諫。而又有德有言足矣。奚必兼彼數者。始爲至耶。夫人李氏。貞順柔嘉。姻里範焉。後君八年卒。子翊。尉東明。自致終喪。亦足彰君刑家之自。今尉元氏。兄羽。有文行。蚤世。銘曰。孰不曰士。于學始志。迄用有成。千百一二。允矣。滕君。敏修篤行。鐘鼓衡門。益大其聲。敕起布衣。于定敦教。祁祁縫掖。來則來效。再主禹城。簿領勾稽。不枉刑墨。仁聞日躋。滿秩而召。入爲冑監。由博而丞。俊髦是範。轉而奉常。禮文斯綱。或革而因。酌損用章。遷拜御史。爲帝耳目。言責塞求。龍鱗逆觸。一不見入。納履而行。反關立言。行後是程。方徵司業。年過知命。遽啓手足。理也莫竟。短者已。而其長斯存。何以貞之。石有誄言。

金故甄官署令魏府君墓碣

燧遠吳中。過廣陵。日。今嘉議大夫行臺御史中丞初請曰。吾祖靖肅公。願言。以吾曾祖甄官署令卽死。所藏亂離失其處。他日必虛爲邱。先塋石載其事。無使吾先人魂遊徬徨。無所于歸。而一善之或遺也。子義

爲銘。隨又遣其少子可亨。擊舟廣陵五千里。追之襄陽。不及返。而及之鄂。授其考所輯家塾記曰。掇是事。銘。嗚呼。確哉。遠而勞焉。迺本之曰。魏氏由唐相知。古子林刺朔州。子孫居桑乾。桑乾爲今宏之順聖。遼有延恕者。生中奉大夫守成。中奉生通奉大夫餘慶。通奉生兜答館酒使子貞。兜答實生甄官署令。君諱允元。改德元。字信之。甄官生進士特賜及第。特賜生思廉。卽記家塾者。思廉生初。初生翰林修撰。必復。可系者是九世。其大于金。由兜答弟資德大夫。參知政事。柱國鉅鹿郡。開國公子平。相世宗。致治隆平。祖考中奉通奉再世官。皆以公貴。贈兜答及子隴右令景元。甄官與逸其諱。一人再世官。皆以公貴。廡君始監順聖酒。改宏州酒使。鄧州權使。抽稅設防。有方與宜。平不增歛。姦無走匿。額有贏籌。民不苛之。入副堂廚庫。又爲使。改文繡。上林兩署令。同知易州。入令裁縫署。改令甄官署。以卒。年六十三。官止廣威將軍。夫人高氏。七男。笏。玳。瑜。琦。玠。璠。玉。琦。大中大夫。行部侍郎。玠。朝列大夫。延安司獄。璠。翰林修撰。今益靖肅公。與特賜。皆以明經進士官。玠。懷遠大將軍。耀州庫使。瑜。監豐利酒。皆廡官。玉。進士。未祿卒。二女。一歸同知荊州節度使事秦德美。一歸其鄉右姓孫氏。君究心本富。計由疇第舍。牛馬雜樹。直可爲錢千者五萬。歲入粟。爲石者三萬。歲抽五十一。爲七子求師。取友。須令節休旬。大集衣冠。令枚誦所業。覈其進隋已。則雁序立前。侍飲前修。聲輝耳目。漸涵化淪。其心由是成德。達才多萃其門。章宗甚嬖李妃。夫人視妃母。王姑也。數召通籍禁中。不可。後從秋獵易州。君方除道橋諸水。復召曰。吾思與若舅弟語久矣。終不能一致。今行之所在是。而夫子倅是。便且時也。無終見避之深。夫人以君出。不敢專行。俾子瑜請之。亦不可曰。是家膏

也。親將汚人人有爲不善者。不憚取戾府縣。惟憚君知。兵興下令急甚。敢有舍奴婢亡命不告者。罪及其鄰人。猶利其傭輕私役之。覺則殺以滅迹。或致大獄。君時鄉居。聞有出入非常者。召問得情。嚴其錮防。書致其主歸之。約示薄威以懲。其再無殘其生。終不語其主以獲之。誰舍所也。比卒。免家僮。久故者民之作詩與新世訣。沐浴冠衣。揆日而逝。君之孝友。天得非學。其使堂廚。以鉅鹿公子叔元未仕。曰。大臣子故屯其膏澤。不見及耶。三求推所居官。縣官以故事無有。不可。又恤其無子。以靖肅後之。靖肅又無子。願言後初。則甄官子孫世世圖報鉅鹿者何如也。其家塾自序曰。由吾季曾鉅鹿輔政。茲降修仁潔義。可謂曰久仕之達者。列品而九。不過中中。天嗇爲報。將待夫後之人耶。最初之仕。外僉提刑司事。爲副。爲使。入爲監察御史。治書侍御史。侍御史。御史中丞。三十年間。風憲之官。無不揚歷。司清議者。猶大有期曰。將不已。是子今嗚呼。自序君其知子哉。矧必復于靖肅公。克世其官。可大可久。與亨。學行嶷嶷。可述。銘曰。反覆觀先民。吁可哀。積充報銜身。期後來。門令容駟馬。堂三槐。必責于天者。如取懷。惟中奉亦然。詳用獄。至鉅鹿再傳。旣鈞軸。官不私其子。甄官承承三遜其季。叩莫磨。又仁厥乏祀。修撰繩官。以祀比言。祀則大。以今修撰孫。後者再。小宗旣顛蕃。大宗賴藏偶。失故所。魂依依。招之從。先墓來如歸。臚臚桑乾原。終天地。碣孰華其文。太史燧。

牧庵集卷二十七

阡表

招撫使李君阡表

君諱聚。單之碭山三章人。以材武善射。昏暮命。中宿烏金之南。播應募爲兵。積勞爲提控。河北俶擾。嘗經大澤。與友相失。獨行葭葦間。與數賊迂。戈汰其股。拔以逐。而盡殺之。然非若是戕已。與敵鬩。未嘗以人血刃。挺身踰河。至儀封。萬夫長孟公熱其父。訪名而客之。署其軍彈壓。尋陞長千夫。與總帥李成同戍皇陵。閏癸巳正月。義宗由此渡河。播歸德。始從成來歸。隸大將阿珠嚕麾下。仍將千夫。從攻歸德。亳州考縣。金平大帥版軍民招撫使。與成將皇陵降民百家徙東明。實田黃頭原。踰萬畝。與佃民及嘗所惠活者數十人。分苦均勞。闢草萊。伐株槩。而擾之。復積穀多至千鍾。疏宗戚族。與四方民工賈醫巫。扶攜婦子。皆往焉。依視其寡乏。歲時衣褐。日月廩餽。婚姻男女之及期。與過而見于者。無不周施。一旦成邑。八謂之小東明。平生襟抱坦明。大兵屠考縣。唯無遺類。一人哀祈生曰。吾某官良庖也。遂匿全之。後召客俾具饌。皆草惡。不可進。君怒詰。則吐實曰。初豈是能。特誑主脫死耳。其不疑人見欺此類。不飲酒。而好客。與成輩數人爲者。年會盡歡。移日忘疲。言惟前朝事。絕口府縣得失。鄉鄰短長。聞人誤及此者。則欠伸思睡。掩耳而起。時以長者多之。每恨失學兵間。課責諸子讀書。如日不足。嘗見今孫國子助教鳳輟書掃霜葉庭下。則起奪

帝自爲曰。無廢而業。于斯須頃且然。其急其篤于成者。可知已。年七十三。疾臥不言數日。子庭玉方令通許歸省。則曰。吾忍死待汝。遂卒。實至元戊寅秋七月二十有三日也。葬以九月十有五日。肇塋黃頭原東。後三十二年。至大己酉。鳳求表君阡。殊懇用。是計君始家之原年。猶未滿三十。方壯士也。當戰伐始休。喘蘇。悸定之時。在他人則徵逐貴介。聲妓是娛。弋獵是習。吹笙鼓簧。馳馬嗾狗。以快酬十年席盾枕戈死所。幸生之勞。而獨自求口食于田畝。觸風雨。犯霜露。與農夫耦耕。頭蓬葆。手蠶而脛不毛。矻矻作苦終歲。而不悔。比開餘饒。衣食於其子孫。而先賑恤鄉鄰。俾不迫于寒饑。亦志而智且惠人哉。前夫人張。二子。庭玉。卒令鄆城。今平章翰林學士承旨閻公復。實銘其碑。庭芝使監大名酒。繼夫人王。二子。庭蘭。兩淮運鹽提領。庭英。同提舉鎮江財賦。二女。歸劉源。馮珪。珪嘗爲江浙行省參政。男孫八人。鵬。懷。孟。路。總管府知事。鶚。使監長垣稅。次鳳也。鴻。福建巡檢。見善使監內黃稅。見道見賢。見可。女孫三。歸士族。張鼎。楊謙。楊某。男曾孫六。好德。好義。好謙。好智。好文。好信。好義。翰林國史院史。續學。續文。銘曰。

聞古子弟。多暴凶歲。荒歉則然。矧金叔世。豪傑彙征。戰伐是閑。其視殺人如芟草菅。人有子女。我壓奴使。人有貨財。利取有已。亂定基此。穰穰厥家。何爲不成。安事耕畬。嗟哉。惟君獨歲勤力。匪種穀求。惟以種德。善也。吾苗。不善。吾蔗。期實百年。庚維溢高。責報于天。如執左契。篤生孫子。文士陞陞。黃頭之原。土厚俗敦。太史銘之。式表墓門。

至元二十有六年。蒼龍在赤奮若。余月初吉。士子宏也。持所自爲其祖事狀來請曰。昔漢故民吳仲山。他傳記無見。嘗由發藏。賑施其鄉。而碑之。至今千年。風雨斷剝之餘。過而誦者。猶懷其人。不置也。非託筆金石力耶。嗚呼。我先祖者。生不策名于天官。歿不受諡于太常。處地卑約。功烈無所表見。一世獨有修之于家。與所惠活。斯人者。顧不可碑之。託銘善言之士。使得以示今而垂後。比漢故民乎。敢以是累公。燧哀其志。揚親。又喜克用力于文。故序之曰。維閻氏曹之漆園人。後徙陳之西華。曾祖諱遵。令陳之宛邱。祖諱某。考諱孟。兩世不仕。君諱瑪。字潤夫。生而明穎。孝謹。長由其外舅申璉。與張子和同侍疾。英邸故。盡得其術。業醫事親。加以潛覃。究誦先秦兩漢方書八年。詣到積中。故施驗于外者。疾輒已。人德報之。則曰。天實生之。非必一出吾術也。人聞不自矜。鬻求藥其門者。日亦滋衆。壬辰。踰河而北。僑居宣德府。以所取醫直衣。食寒士申岳陳。遂孫周郭通。至則館其廬。去則贖之。魏學士邦彥玉峯亦略行位與遊。時召諸道醫。悉領于奉御田闕。將以君偕北。進尙醫列。固以學識淺淺。不可親上辭。稍居南。留真定二年。踰河。將復鄆城。以先業簫條。無誰與鄰。留鄆陵十年。徙洧川。年五十。飭其子曰。吾從學良醫。又勤心奇書。古方。卒遇一疾。猶眩迷于先民數十成說。竟不敢必何方定。可已疾。殆以疾試方。況若無吾問學者。得吾術。自己其疾。則可無輕出治人也。遂亦自棄醫。儒服。教子孫讀書。恭儉質直。異不忤物。而同不徇俗。介不附勢。而強不赫威。又精術攝。凡飲弈談。謔無益汨戕魂神者。終身絕不蹈爲。故能壽考。八十二卒。實至元二十三年十月二十有八日。妻申渤海宦族。能通孝經論語。天父天夫。孝賢兩聞。年六十二。凡前君卒十七年。至是合葬洧。

川某原二子。鼎吉。今尉潭之瀏陽縣。逢吉前君卒一年。女子二人。一適太原劉麟。一適鄆陵張琮。男孫八人。宏也。獻民。天民。舜民。他未名。女孫七人。幼男曾孫二人。益幼。銘曰。

彼函工。猶擅仁。矧君醫。志全人。業卅年。起死頻。以其羸。及士貧。晚棄學。篤自信。父一鄉。儒冠巾。八十二年。疇倫。高可隱。墳洧濱。夷考先。由令陳。陲三世。迭不振。維穹蒼。連環循。屈之久。宜寢伸。傳瀏陽。初命臣。授汝戈。盜之胸。在後昆。奚異身。非于歲。磨不磷。默然信。期茲珉。

安西路同州儒學正潘君阡表

至大之元。江南行臺監察御史潘汝劼。時爲中臺照磨兼獄丞于安西。校官楊定。序壬辰變。遷關輔民。其祖德卿。與祖妣彭銜段者。訣。或我他日。相失兵間。前配封出子浚。與汝子溫。生五年矣。俟時清謐。無使廢學。雜行遷民。失所如往。妣流離平陽。風雨寒暑。窘蔽土屋。井汲竈煬。匪躬不致。須紡緝備。資學二子。艱百罹。爲操益確。久人信之。婦婦姆女。皆取爲法。且圖諸孫受所。鑄誨。有踐與別。于所序前。頌詠盈軸。燧奪史事。獨未遑。詩今年。再手太子文學張養浩事狀。欲表其考學正之阡。嗚呼。不腆之文。豈足增華元閭。而煩諄復見。丐耶。惟潘氏同之白水人。君字仲良。則諱溫者。曾祖宏。登宋武科。嘗令赤縣。祖挺。考震亨。則德卿。以詞賦魁金進士。夫人則鄉先生段適安之妣。由徽平陽童男入燕繡局。資浚以行。惟督君學。比其還秦。六籍之文。言熟義通。郭溫伯女。以妣之子楊。時邳大用。妻子法呂仲和。來明之顧副言。楊君美諸公。皆先朝明進士。孟駕之張器玉。又其少者。而君無不遊造其門。得其延譽。聚徒教授。道化之行。鄉鄰訟鬪。不愬。

公宮司平其家。悉至歎去。仇解好合。川蜀之士。奴于人者。賦錢富室。贖登儒廟。舉卑陋捐幣爲的。倡其郡民。徙基高明。州守邑令。爲佛民欲。每自愧匿。恐其聞知。一臧否言。爲采風謠。取以陟黜。由朝廷旌別。奴民。勢家訟君及民十餘家。云皆其父祖俘自軍中。君倡赴秦省。力辯其非。或曰。汝自士籍。明詔已拔齊編氓。何苦于他人爲哉。君則曰。吾與是皆同鄉。視其誣。不一手援其溺。非義。竟還正民。絕口不矜德。由己。然人則惠之。至元二十年。野仙擢同之學正。是前一年。走副秦憲。凡三補郡縣。而皆嘗驅車馮翊朝邑。郃陽澄城。白水爲同之屬縣。獨君位是師儒。身任表式。數百里閒。篤民明倫。亦豈輕哉。教又非昔私淑人者。爲將十年。旣謝病歸。自號安分野人。爲約白水。凡我同姓。瑩是邑者。歲時上冢。無閒疏戚。老幼畢集。周及諸宗。實獲古人糺族遺意。而入燕兄不聞問者。五十餘年。攜一子歸。悲盡繼喜。晨夕奉之。若大賓。然年七十五。當大德辛丑。夏五月七日卒。疾革。來諸子前曰。吾于吾親。雖孝無所顯揚。而獲免玷辱。惟忠不及事君。若曹他日。或有有用世。其竟吾志。走哀之曰。莫匪臣也。惟視所在。晨門夜柝。不廢乃事。猶足曰忠。矧君尊聞行知。範其鄉州。不調十年。亦事君矣。奚其訐謀廟堂。捍禦疆場。奔走豆籩金粟。當會郡縣。率職始名。宜力耶。二夫人楊燕子八人。長勳。次訪也。勵勉効勛助勛。勳鞏昌帥府奏差。他皆業儒。一女歸信氏。男孫十人。未名。銘曰。

繫考府君盛文華。竄身金亂死不家。妣夫人爲魯人。鬻生君五年。猶羈童。焚焚遠逐。遷民東。天窮其身。操不窮。夫其所安人何嗟。束君子學蓬在麻。闕贖貯腹書盈車。返秦先進門刺通。杖者倒屣相將逢。展于朋

儻異其曠。由是聞譽日益加。私淑筆耕代舊畬。以古指南塗安差。蒐才乃如平章公。用官州校祿小豐。身教不令士自從。十年謝老歸彭衙。敦宗諸潘方拜嘉。忽焉白露淒蒹葭。垂絕不忘帝降衷。尙飭八子以孝忠。八子喻指無齊同。南紀劫今綰青綱。鐵冠義我豸觸邪。振而家聲後將遐。

鄆陵主簿毛府君阡表

世所曰君子者二焉。曰位焉德也。位其名。德其實。位顯而德不充。人則與其名曰。幸也。致然君子則未也。德修而位卑。人則與其實曰。不幸不得敷施所蘊。一時雖然。君子自若也。有人于此。學以潤身。道以悅親。莊以齊家。恭以與人。清以涖官。幼老一致。無可疵類。可不謂德乎。可不謂君子矣乎。燧于聰山。毛君見之。君諱憲。一諱順。字吉父。廣平肥鄉人。曾祖弼。祖仁。考冲霄。金扶溝主簿。金亡。反其鄉。與寶司徒文正公遊。妣全。前卒。事繼妣成。惟孝。十五能自植。授徒其鄉。我先世父文獻公聞其善學。大書夙夜以思。無益不如學也。十字爲勸。扶溝卒。廬墳終喪。郡舉孝廉。監洛磁常平倉。受米八萬石。責守其出。七年而絕。猶羨三千石。司徒爲翰學。授檢討官。曰爲史。太尉忠武公講治鑑。歲餘。辟主鄆陵簿。求便妣養。歸爲邢之書表。令史始邢與侯鈞州。及陞邢爲順德府。君則白侯。邢洛鈞功臣封邑。由邢嘗開安撫司。故洛受其節度。今邢已府而洛猶州。求諸地志。洛實古廣平郡。領邢洛磁威四州。洛獨不能引爲比耶。事聞陞廣平府。各爲路。始不相一。侯有病。郡井鹵敗者。議渠洛灌墮。以流惡。君曰。渠洛不如渠溢。洛去郡北五十里餘。其流先卑。逆導之難。溢在郡西南。其遠雖倍而高。渠之可勢必至。旱資溉田。潦資伐材。薪蒸結藁。或免車檐。可水輪地。

聽民爲業。郡食甘冽。反餘利也。侯是其言。發民渠之。再歲而成。其所永賴。一如君策。篋篋餘力。必集諸曹。勸之設書。曲周民妖言惑人。責與其令。故山南廉副。馮帖治獄。芟其牽辭。不多追逮。惟置首惡于理。凡掾府十二年。都目沁州。滿去而人益思。轉汴梁提控。按牘兼照磨官。物務殷繁。裁析裕暇。于邢于洛。于沁于汴。侯牧來者。皆客遇之不吏也。及除濟南。上口巡檢。乃太息曰。吾家世儒。顧棄所素。而逐盜耶。兒淵副。巴圖總管子江陵松滋。吾其從養。號聽山。出與邑士唱酬。詩入陶韋社中。家居卷不去手。老而彌篤于學。如此。以至元己丑五月十一日。年六十三而卒。創塋松滋濃東。夫人張氏。賢淑有聞。子三人。光祖淵洧。光祖前卒。淵和粹敏明。善文能官。今以朝列大夫。眞爲總管。洧從仕郎。管民總管。一女。歸鄭州張某。男孫穎。孫女歸同邑金尙書右丞文定董公師中孫植。幼居室。銘曰。

於維毛公。爲周司空。受遺成王。太保爽同。後十六王。當襄末世。粵有毛伯。猶王卿士。遂客平原。備十九人。從楚一言。完趙卻秦。自時竹帛。賢哲世有。君其遺苗。居德孔阜。授徒肥鄉。終養扶溝。斗食晨門。便妣是謀。辭尊而卑。輟行以躡。匪人之爲。實我之自。而位不充。命也如何。遺澤在洛。滏水同波。享在其子。受服三命。爲良牧臣。足鴻爾慶。濃水之東。馬鬣其封。走銘之阡。可示無窮。

阡碣

提刑趙公夫人楊君新阡碣

維蔚州蜚狐趙氏。系不可遠本。由今江西湖東道肅政廉訪使秉政而上。推得二世祖崑金帥府評事。卒葬其鄉。二子珪瑁。珪將萬夫。戍蜚狐。後遷刺蠡州。留瑁在鄉守舍。天馬南牧。度形勢不支。倡縣民以城下之。從太師國王徇地至蠡。其刺猶城守。礮殺王悍將蕭大夫。王恚。欲坑城。公請以身贖母兄死。王哀之。併全蠡民。以戰績。每最。進冀州元帥虎符。復推與其兄。廷議多其悌讓。改公冀州軍民總管。別錫虎符。入覲。受知睿宗。承制監易州。再遷行省中都。金平。監中山府。當憲廟世。世祖方淵龍。收召聞望之臣。求治道之宜。今者。置經略司于河之南。宜撫司從宜。府于陝之西。行部于秦。都漕于衛。東西二千里。道不拾遺。而邢則今中書右丞相之祖。封國政弛。民散。故號弗治。求潛藩制官。惟歲入其貢賦。爲置安撫司。後邢易爲順德。升州爲府。乃以近故太師廣平王從祖託克托。與公爲斷事官。位安撫上。公年盛強。俾與開國勳臣苗。胄爲友。則潛藩期任公者。已不小矣。世祖踐極。制監真定路。位總管上。俄遷順天路。宣慰使。肇置四道提刑按察司。以公使燕南河北。轉使河北河南。累章請老。不可。年七十九。始聽歸。卒。年八十三。以監中山。有田朱固鄉。不返葬。飛狐。卽瑩。是鄉。堯封原。亦昭時崇顯壽考人也。夫人旣同享有其樂。公當不恙。亦以官植業順德。盡析秉政。夫人從養。及子貴。食其祿以終。年八十二。不及公才一年。何壽考萃是一門哉。因惟女子子天父天夫者也。父不能必子之貴。能之者。夫子焉耳。而難其全。今之儲才將相。係望海內者。每在乎風紀之官。夫人以提刑使之妻。而母廉訪使。詩曰。教誨爾子。式穀似之。彼弈葉襲芳。不隕世德。夫人之功。亦鮮儷哉。古邦君之妻。邦人曰小君。禮士喪妾不得匹其夫。必曰君妻。曰女君。後世封羊祜妻爲萬歲。

鄉君則令甲郡縣君之原。可爲今不敢氏夫人而君之之凡。其不反葬中山。卽別塋順德李馬村。若不同穴。記稱合葬。非古也。因求之吾家嶺州都督文獻公開元宰相考也。葬陝之峽石。百官咸會焉。及妣夫人劉卒。則葬萬安嵩高西趾。去峽石二百里耳。以唐相之貴。月入俸錢三千緡。有力不足干至哉。則不合祔者。亦從古也。今秉政斯兆。未必始亦由此。燧以其千古有徵。爲發之。夫人生三男二女。男秉政秉彝。秉衷女適焦簡。周某孫男女九人。秉政又曰。吾他日亦域是。嘗聞諸師。古人不諱死。惟不趨取死之途。今之人鼎鼎焉。惟死度之趨。復苦諱死。亦惑哉。如師之言。則秉政不徇流俗。語身後事于其生。亦庶幾古達者也。銘曰。

襄國所直。趙南魏北。其西太行。冀方四塞。求田惟良。宜莫如襄。衍沃平平。千里其疆。生家其閒。沒卽斯瘞。奚取日者。風水焉泥。孰培平原。如阜而尊。左之右之。昭婦穆孫。天厚其門。旣壽旣祉。流澤淵淵。未艾來只。世生顯人。如夫如子。

